

# Festival

di idioma

A2

Ronnie Severing, Ria Severing-Halman,  
Mavis Ersilia, Marelva Mathilda,  
Sharine Juliana, Ange Jessurun

**Klas 2**

### **Colofon**

Fundashon pa Planifikashon di Idioma di Corsou a desaroya e metodo Fiesta di Idioma riba encargo di gobierno di Corsou. Seccion Desaroyo di Curiculo di Departamento di Enseñansa a adapta y contextualisa e metodo aki cu tin como titulo Festival di Idioma.

### **Grupo di trabou di Aruba**

Evelina Dania, Ludwina Koolman, Selvia Lumenier, Maritza Petrocchi, Elvia Solognier, Lidwina Solognier, Jeannine Tromp - Maduro y Pedro Velásquez  
Gracy Dijkhoff, lider di proyecto  
Barbara Meaux, asistente lider di proyecto

### **Conseho linguistico**

Ramon Todd- Dandaré  
Swinda de Cuba

### **Consehero didactico**

Aura Arends  
Magriet Pourrier

### **Redactor final**

Swinda Schwengle, Juan Maduro

### **Ilustracion**

Jort van der Jagt, Mark Janssen,  
Anjo Mutsaars, Nancy Kers

Un palabra di danki ta bay na:

Jeanne Ecury y e maestranan di Colegio Conrado Coronel y di Colegio San Hose

### **Realisacion**

Wietske Dijkstra

Derechonan reserva. No ta permiti pa reproduci nada di e edicion aki di ningun forma, ni pa ningun medio, sin autorisacion previo y por escrito di e editorial.

ISBN: 978-99904-1-950-4

Imprenta 2025: 2-1




## Contenido

6 Mi amigonan	<b>4</b>
7 Scol y comedia	<b>44</b>
8 Den bario y mas leu	<b>84</b>
9 Awa	<b>124</b>
10 Ban Pais di Aventura y Pais di Soño	<b>164</b>

## 1 Scucha y papia

### Combersacion den kring

- Awe bo ta bay papia den kring.
- Bo ta bay papia tocante bo *amigonan*.
- Ken ta bo amigonan?
- Dicon boso ta amigo di otro?
- Bo rumannan y bo primonan por ta bo amigo tambe?
- Kico bo ta haci hunto cu un amigo?
- Dicon ta asina dushi pa tin hopi amigo?



**Regla di combersacion**

*Regla di combersacion di awe ta: Niun di nos no ta keda mucho largo na palabra, pasobra tur hende tin gana di bisa algo.*

## 2 Mi por lesa

### Ronny cu Rocky ta verf

Ronny cu Rocky ta bon amigo.  
Nan ta biba banda di otro.  
Kiermen, nan ta bisina tambe.  
Ronny cu Rocky ta bay e mesun scol y nan ta den e mesun klas.  
Unda bo mira Rocky, bo ta mira Ronny.  
Y unda bo mira Ronny, bo ta mira Rocky.  
Bon mira, nan ta amigo for di dia nan tabata baby y nan tabata hunga hunto den box.

Tur merdia despues di scol Rocky ta bin hunga cerca Ronny of Ronny ta bay hunga cerca Rocky. Pero awe si nan no tin gana di hunga.  
Un verfdo a bin duna e cas di Ronny un man di verf.  
Ronny cu Rocky tin masha gana di yuda, pero esey e verfdo no kier.


“Boso ta susha boso curpa”, e verfdo ta bisa. “Laga mi so verf numa. Miho boso bay hunga bala.” Pero Ronny cu Rocky no kier skit. Nan ta keda para wak con e verfdo ta haci su trabou. Atardi e verfdo ta warda su material di trabou.


Prome e ta laba e cuashinan. Despues e ta warda e blekinan di verf y e cuashinan den e cashi grandi den garashi. Asina e homber bay, Ronny cu Rocky ta habri e cashi bek. Rocky ta saca un bleki di verf geel y Ronny ta saca un bleki di verf cora.  
Despues nan tur dos ta coy un cuashi.  
“Kico nos lo bay verf awor?”, Rocky ta puntra Ronny.

“Bo sa kico lo ta pret?”, Ronny ta bisa, “si nos duna tur troncon di palo un otro color.”  
“No ta mal idea”, Rocky ta bisa, “boso cura lo bira masha nechi.”

Ronny ta habri su bleki y Rocky ta habri di dje y nan ta cuminsa verf.

*E cuenta ta continua.*





### 3 Bo a compronde?

- Lesa e cuenta prome.
- Despues contesta e preguntanan.

### Pregunta

1. Ronny cu Rocky ta bon amigo. Kico mas nan ta di otro?
2. For di ki dia Ronny cu Rocky ta bon amigo?
3. Kico e dos amigonan ta haci despues di scol?
4. Dicon Ronny cu Rocky no tin gana di hunga awe?
5. Dicon e verfdo no kier pa nan yuda?
6. Kico e verfdo ta haci prome cu e warda su material di trabou?
7. Na unda e verfdo ta warda su cosnan?
8. Kico Ronny cu Rocky ta haci ora e verfdo bay?
9. Con bo ta kere e cuenta ta sigui?
10. Kico kiermen: E verfdo a bin duna e cas *un man di verf*?
11. Cua material y herment un verfdo ta uza?
12. Boso ta kere cu e palonan a keda contento cu Ronny y Rocky a verf nan troncon?

### 4 Vocabulario

#### Amistad

David ta para na bentana.  
 E no tin gana di haci nada awe.  
 E ta un tiki tristo.  
 Su cacho ta malo y e no por  
 hunga cu ne.  
 David tin gana pa su amiga Laura of  
 su primo Raul bin hunga cerca dje.

David ta kita for di bentana.  
 E ta cana bay na telefon.  
 Prome e ta yama su primo Raul.  
 Raul no ta na cas.  
 El a bay cine.  
 Awor David ta yama su amiga  
 Laura.  
 Laura tampoco no ta na cas.  
 El a bay pasa dia cerca su wela.

David ta cana bay pafo.  
 E ta sintie su so.  
 Ora bo ta cu mas hende,  
 bo no ta sinti bo laf.



Paco ta ... cu Mila.



Curt ta ... Dona.


#### Tarea 1

Cua palabra falta den e frase?  
 Lesa e frase bou di cada plachi.  
 Busca e palabra cu falta den e rij  
 di palabra akibou.  
 Skirbi e palabra den bo buki di  
 tarea.

• brasa

• consola

• exclui



Curt y Nina ta ... cu otro.



Lara ta ... Elvia.



Curt y Nur ta ...Timo.



Rina y Jendrick ta ... otro.

## Tarea 2

*Bo sa e contesta?  
Kico ta bon pa haci y  
kico no ta bon pa haci?*

- tenta un mucha
- consola un amigo
- brasa un amigo
- exclui un mucha
- parti cu un mucha

- bringa cu un mucha
- caricia un amigo of un bestia
- zundra un mucha
- yuda un hende

• parti

• pleita

• tenta

## 5 Pensa bon

### 5a Kico bo ta yena?

- Den cada frase falta un palabra.
- Busca e palabra cu falta.
- Skirbi e palabra corecto den bo buki di tarea.

Bo por scoge for di:

amigo – amistad – gaña – hunga – secreto

### Lily cu Tico

1. Lily cu Tico conoce otro bon, nan ta ...
2. Ora nan bay cerca otro, nan ta ... wega hunto.
3. Nada no por kibra nan ...
4. Nan no tin ... pa otro.
5. E amigonan aki no ta ... riba otro.


Bo por scoge for di:

brasa – duna – kinipi – pasa – sunchi – tira

### Cerca famia

1. Marla ta bay ... dia cerca su famia.
2. Prome e ta duna su madushi un ... na su cara.
3. Su welo si semper kier un ... fuerte.
4. Di leu Tanchi ta ... un sunchi p'e.
5. Mo Frenky ta ... wowo cu ne.
6. Primo John ta ... Marla un man.





### 5b Drecha frase

1. na bentana – ta para – David.
2. gana di haci – E – no tin – nada.
3. ta yama – su primo – David.
4. cu su mama – Raul – a bay – cine – Pero.
5. cu su primo – David – kier bay – tambe – cine.



### 5c Traha palabra

- Tin cada biaha dos palabra banda di otro.
- Scoge for di cada palabra dos letter cu ta sigui otro.
- Traha un palabra nobo cu e letternan cu bo a scoge.
- Skirbi e palabra nobonan den bo buki di tarea.

Wak e ehempelnan:

sucu – kima → cuki

faya – haci → faha

- Haci asina cu e palabranan akibou.

1. baca – laba
2. come – coneu
3. wela – gana
4. hasa – lana
5. hole – pica
6. cose – robo
7. sapo – rabo
8. riba – malo
9. tapa – kita
10. arte – rama



**6 Skirbi bon**

**6a Cua kolom bo ta scoje?**

- Den cua kolom bo ta skirbi e palabra?
- Traha e tarea aki den bo buki di tarea.




blauw – cangreu – cuadro – cuanto – cuashi – cueba – cuero –  
huala – leu – meuchi – pauze – prueba


ua	au	ue	eu

**6b Wak bon!**

- Completa e palabranan akibou.
- Bo por scoje entre:  
ai – ay – ia – io – oi – oy – iu – ui
- Skirbi e palabra corecto den bo buki di tarea.

1. Lita ta pap... cu su amiga.
2. Nan tin un palofr... den nan man.
3. Amigo Jendrick ta j...n nan dos.
4. E ta b... sinta banda di un b...s.
5. Curt ta conta nan un stor... cu el a tende na rad...
6. Ta un cuenta di un p...to cu kier a bay Playa riba lomba di un moroc...





### 6c Completa palabra

- Na cada palabra falta letter.
- Wak cua ta e letternan cu falta.
- Scoge for di e clusternan.
- Skirbi e palabranan den bo buki di tarea.



*Un ehempel*

gl – kl – pl                      planchi

Sigui asina

- |                 |        |                    |         |
|-----------------|--------|--------------------|---------|
| 1. br – kr – pr | ...eto | 2. bl – kr – st    | ...achi |
| 3. dr – fl – sp | ...ado | 4. kl – sc – tr    | ...onde |
| 5. sk – sp – sm | ...ada | 6. skr – spr – str | ...eki  |

Awor asina aki

- |                  |         |                     |          |
|------------------|---------|---------------------|----------|
| 7. el – en – er  | ang...  | 8. ft – nt – rt     | rappo... |
| 9. ay – ia – ey  | batr... | 10. eu – uy – iu    | par ...  |
| 11. ls – ns – ts | le...   | 12. ieu – you – uay | baki...  |

### 6d Traha kolom

- Bo mes traha un kolom awor cu palabra cu ta caba cu ns of rs.
- Traha e tarea aki den bo buki di tarea.

**ns**

1. spons
2. ...
3. ...

**rs**

1. mors
2. ...
3. ...




### 1 Scucha y papia

#### Lesá buki

Jendrick ta drumi den hamaca.  
E ta lesa un buki.  
Diripiente Jendrick ta tende su nomber.  
Ta Robby, su amigo, ta yam'e.  
Robby kier hunga bala cu Jendrick,  
pero Jendrick no tin gana.  
E kier sigui lesa.  
Mas amigo ta bin yama Jendrick.  
Pero Jendrick no kier bay hunga.  
E kier sa con su buki ta caba.  
E kier sigui lesa.  
Kico Jendrick ta bay haci?

- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.





## 2 Mi por lesa

*Continuacion di e cuenta*

### Ronny cu Rocky ta verf

E troncon di e palo di mispel ta bira geel. E troncon di e palo di mango ta bira cora.


“Dos color di verf so ta laf”, Ronny ta bisa y e ta bay den garashi pa coy dos bleki di verf mas. E troncon di e palo di kenepa ta bira oraño y esun di e palo di mahok ta bira blauw.

Ronny cu Rocky ta verf asina concentra cu nan no ta ripara cu Bobby a bin para nan tras. Bobby kier sa kico tin den e blekinan di verf. Ta awa of ta cuminda dushi tin den nan?

Bobby ta hinca su cabes den un bleki. Den e bleki cu verf cora. “Wou”, Bobby ta bisa, “e awa aki si tin un color straño. E parce refresco cu hende sa bebe.” Bobby ta hinca su cabes un tiki mas den e bleki di verf y e ta bebe for di e bleki. “Uh, uh”, Bobby ta tosa, “e refresco aki si ta smaak vies.” Ta e ora ey numa Ronny cu Rocky ta

ripara cu Bobby ta para nan tras. “Wak Bobby!”, Rocky ta grita, “el a lipstick su boca. Su boca ta tur cora!” Ronny cu Rocky ta hari. Nan ta hari te pega aden. Nan no ta ripara mes cu Ronny su tata a yega cas.

“Ta ki bochincha tin akinan?”, Papi ta puntra. Na mes momento Papi tambe ta mira Bobby. Bobby cu su boca cora. Papi ta mira cu tur troncon den cura tin un otro color. Papi ta rabia. Papi ta rabia masha hopi mes. “Aworaki mes boso ta bay laba e cuashinan!”, Papi ta bisa. “Despues boso ta warda tur e blekinan di verf. Boso ta bay baña pover Bobby y despues boso ta coy e slang di muha mata y haci tur e tronconnan di e palonan limpi. Menos mal cu ta verf di awa boso a uza. Awe si boso a haci cos di mala mucha.” Ronny cu Rocky ta sak cabes. Mesora nan ta bay laba e cuashinan. Nan no ta ripara cu Papi tin un sonrisa riba su cara. Papi ta haya e cos toch un tiki pret anto.





### 3 Bo a compronde?

- Lesa e cuenta prome.
- Despues contesta e preguntanan.

#### Pregunta

1. Menciona cua color troncon di e palonan ta haya.
2. Cua color di verf mas Ronny ta bay coy den garashi?
3. Dicon ni Ronny ni Rocky no ta ripara cu Bobby ta para nan tras?
4. Kico ta pasa cu Bobby?
5. Dicon Ronny cu Rocky ta hari ora nan mira Bobby?
6. Kico Papi ta bisa ora e mira Bobby y e tronconnan den cura?
7. Con bo sa cu Papi ta haya e cos aki un tiki pret toch?
8. a) Ki tipo di verf nan a uza?  
b) Ki tipo di verf mas tin?
9. Cu kico nan ta laba e cuashinan?
10. Ronny cu Rocky ta *hari te pega aden*. Kico esaki ta nifica?
11. Menciona dos herment cu un carpinte ta uza y dos herment cu un metsla ta uza.
12. Kico asina un metsla ta haci?

#### 4 Vocabulario

##### Yasir y Lisa

Yasir ta Lisa su bon amigo.  
Lisa ta haya Yasir masha lief.  
Tur su amiganan sa esey.  
Yasir si no ta bisa nada.  
Yasir ta haci tur cos pa Lisa.  
E ta carga su tas bay auto y  
e ta yuda Lisa cu som  
cu Lisa no sa bon.  
Ora Yasir haya un buki nobo,  
ta Lisa ta les'e prome.

Un dia prome cu dia di  
San Valentino Yasir ta cumpra un  
bunita tarheta.  
E tarheta ta p'e duna Lisa.  
Na cas Yasir ta habri su tas y e ta  
spanta.  
Juice a basha riba e carchi.  
Yasir ta hopi tristo.  
Awor e no tin sorpresa pa Lisa  
mas.  
Su manece su maestra ta duna tur  
alumno tarea pa traha un tarheta  
pa dia di amor y di amistad.  
Yasir ta pinta y skirbi e tarheta  
di mas nechí di su klas.  
E tarheta ta pa ... Lisa!



Papi ta duna Mami un ...



Bisiña ta duna Tanta un ...



Tanta ta duna Omo un ...

• boket di rosa

• candelaria

• cuadro



Mami ta duna Papi un ...

### Tarea 1

Cua palabra falta den e frase?

Yasir ta duna Lisa un tarheta di amistad.

Kico mas un hende por duna otro?

Lesa e frase bou di cada plachi.

Busca e palabra cu falta. Nan ta den e rij di palabra akibou.

Skirbi e frase den bo buki di tarea.



Bisiña ta duna Wela un ...

### Tarea 2

Bo kier haci un fiesta chikito dia di San Valentino.

Con bo ta combida bo amigonan?

- Bo ta yama nan.
- Bo ta manda un mail.
- Bo ta traha un carchi di invitacion.
- Bo ta invita nan na scol.

Skirbi e contesta den bo buki di tarea.



Wela ta duna su nieta un ...

### Tarea 3

Ki sorto di regalo bo mes por traha

pa un amigo pa dia di San Valentino?

• lantera

• mousepad

• peluche

## 5 Pensa bon

### 5d Completa palabra

- Lesa e palabranan den e kolom akibou.

bisa...  
drum...  
pasa...  
pega...  
salba...  
spanta...  
tapa...  
wanta...

- Cada palabra falta un pida.
- Scoge for di e pida palabranan akibou y completa e palabranan den e kolom akiriba.
- Skirbi e palabranan nobo den bo buki di tarea.

bida – set – boca – lodo – parha – saya – dera – wela


### 5e Comparacion

- Cua palabra bo ta yena?
- Bo por scoge entre:

cacho – patia berde – prikichi – sardinchi – trom

1. Cay manera ...
2. Balia manera ...
3. Papia manera ...
4. Manera ... den bleki.
5. Biba manera pushi cu ...





### 5f Caba frase

- Haci e frasenan mas largo.

1. Awe Ronny cu Rocky no .....
2. Nan ta verf .....
3. Bobby kier wak kico .....
4. Rocky ta grita: "Bobby a ....."
5. Bobby su boca .....
6. Papi ta bisa: "Boso ta bay ....."
7. Awe si Ronny cu Rocky a haci .....



### 5g Cua palabra bo ta yena ?

- Den cada frase falta un palabra.
- Busca e palabra cu falta.
- Cada palabra ta pa un solo frase.
- Skirbi e palabra corecto den bo buki di tarea.

Bo por scoge for di:

papel – famia – cortico – mesa – regalito – special – stoba

### Dia di San Valentino

1. Na mi cas San Valentino ta un dia ...
2. Henter ... ta come hunto.
3. Mi mama ta dorna nos ... tur na flor.
4. Mi papi ta cushina cabrito ...
5. Ami ta corta un curason di ... pa pone bou di tayo.
6. Mi ruman muhe ta skirbi un poema ... pa nos tur.
7. Cada un di nos ta haya un ...



### 6 Skirbi bon

#### 6e Lesa y skirbi


- Lesa e frasenan akibou bon.
- Skirbi e palabranan cu tin un color, nechi y sin fout den bo buki di tarea.

1. Ronny cu Rocky ta bon **amigo**.
2. Nan ta **bisiña tambe**.
3. Tur **merdia** nan ta **hunto**.
4. Awe si nan no tin **gana** di **hunga**.
5. Nan kier yuda e **verfdo**.
6. Asina e **homber** bay, nan ta cuminsa **verf**.
7. Tur **troncon** den **cura** ta haya un **color**.
8. Hasta Bobby su boca ta bira **cora**.

#### 6f Dictado

- Awor bo ta bay scucha un dictado.
- Bo maestra/o ta ripiti e palabranan cu abo tin cu skirbi.





## 6g Skirbi un tarheta

Bo ta desea di duna un hende cu bo gusta of stima un sorpresa? Ken bo kier sorprende?



- Pensa algo bon di e persona.
- Skirbi e compliment aki riba un blachi prome.
- Despues bo ta skirbie riba bo tarheta.
- Bo ta skirbi bo number acerca.
- Djey bo ta dorna e tarheta manera bo kier.
- Wak e ehempel akibou prome.

*Mi mami stima,*

*Semper bo ta asina lief.*


*Casi nunca bo no ta rabia.*

*Bo ta haci tur cos pa mi.*

*P'esey mami, mi stima bo.*

*Ivo*





## 1 Scucha y papia

### Combersacion den kring

- Awe bo ta bay papia den kring.
- Bo ta bay papia tocante pleitamento.
- Hende por mira na bo cara cu bo ta rabia?
- Cu ken bo sa pleita?
- Bo sa pleita cu bo amigonan tambe? Dicon?
- Con boso ta haci bon cu otro?
- Dicon pleitamento no ta bon?

### Regla di combersacion

*Si nos kier conta algo, nos ta conta esey na tur mucha den nos grupo.*

## 2 Mi por lesa

### Wega di kiniki

Scol tin pauze.

Manuel cu Nico ta hunga kiniki den cura di scol.

Nan ta hunga kiniki den ronchi.

Layo ta para wak e dos amigonan hunga.

E tambe kier un wega.

“No, Layo”, Manuel ta bisa,

“abo no ta hunga.

Bo no gusta perde y semper bo ta pleita.”

“Laga mi hunga, no”, Layo ta roga.

“Mi ta priminti cu mi no ta pleita.

Mi tin un sacco yen di kiniki.”

Manuel cu Nico ta drey wak otro.

“Bon”, Manuel ta bisa. “Pa e biaha aki so.”

Wega ta cuminsa.

“Ami kier tira prome”, Layo ta bisa.

“Pakico?”, Manuel ta kik.

“Ta awor numa bo a drenta wega y ya bo kier manda.”

“Masha ora boso ta hunga”,

Layo ta contest’e.

“Duna mi tambe un chens awor.”

Layo ta tira su kiniki.

Su kiniki ta cay pafo di e ronchi.

Despues Nico cu Manuel ta na turno.

Nan kiniki si ta cay nechi den e

ronchi.

Layo ta bolbe tira.

Pero atrobe e ta tira mucho duro.

Su kiniki ta cay leu for di e ronchi.

Layo ta hisa su schouder.

E ta lanta coy su kiniki y

ta pon’e den e ronchi.

“No, no, no, esey si no por”,

Nico ta reclama.

“Bo no ta tene bo na regla.

Bo no por pone kiniki cu man.

Nos no ta hunga cu bo mas!”

“Ah, no?”, Layo ta bisa,

“si mi no por hunga mas,

mi ta bay cu mi sacco di kiniki.”

Layo ta coy su sacco di kiniki y

ta cana bay rabia.

*E cuenta ta continua.*





### 3 Bo a compronde?

- Lesa e cuenta prome.
- Despues contesta e preguntanan.

#### Pregunta

1. Manuel cu Nico ta hunga den pauze. Nan ta hunga kiniki den ronchi. Cua wega di kiniki mas bo conoce?
2. Cua wega mas bo por hunga na scol?
3. Dicon Manuel no kier pa Layo hunga cu nan?
4. Kico Manuel ta bisa Layo ora e kier tira prome?
5. Kico Layo ta contesta Manuel?
6. Cua te e reglanan ora di hunga kiniki den ronchi?
7. Kico Layo ta haci ora Nico cu Manuel bis'e cu e no por hunga mas?
8. Con bo ta haya e comportacion di Layo? Dicon?
9. Kico abo lo haci si un mucha no ta mantene su mes na regla di e wega?
10. Menciona algun regla di un otro wega cu abo conoce.
11. Bo ta haya cu Layo tin rason di rabia? Dicon?

#### 4 Vocabulario

##### Ken a gana?

Lara, Tessa y Mayra ta pusta ken por core mas duro.

Lara ta hala un liña abou.

Nan tur tres ta bay para riba e liña.

“Mi ta conta te tres”, Lara ta bisa.

“Ora mi bisa tres, nos ta cuminsa core. Esun cu yega prome na e otro banda di e plenchi a gana.

Boso ta cla?”

Mesora Lara ta cuminsa conta: “Un, ... dos ... tres.”

Nan tur tres ta core.

“Ya! Ami a yega prome”, Tessa ta grita ora e yega na e otro banda di e plenchi.

“No ta berdad”, Mayra ta respond’e.

“Ami a yega prome.”

“No”, Tessa ta kik, “t’ami a gana.”

“Ami sa cu t’ami a gana!”,

Mayra ta bolbe bisa.

“Mayra tin rason, bo sa, Tessa”,

Lara ta bisa, “m’a mira cu el a yega prome.”

“Boso ta hunga wega di ladron”, Tessa ta respond’e.

Bon mira, Tessa no sa sigur si el a yega prome di berdad, pero e ta kere cu si.

Mayra ta wak masha rabia.

“Tsss”, e ta bisa, “mi no ta hunga cu bo mas. Mi ta hunga cu Lara so.”

Lara cu Mayra ta cana bay.

Y Tessa?

Tessa ta keda su so atras.



• brabo

• caricia

• falso



<p>1 <b>Nos ta rabia cu otro.</b></p>  <p>Nos kier ... cu otro.</p>	<p>2 <b>Mi gusta paz.</b></p>  <p>Mi no gusta ...</p>	<p>3 <b>Mi ta simpatico.</b></p>  <p>Mi ta un bestia ...</p>
<p>4 <b>Mi sa huña.</b></p>  <p>Y tambe mi sa ...</p>	<p>5 <b>Grrr, tene cuidou!</b></p>  <p>Mi ta ...</p>	<p>6 <b>Mi ta fiel.</b></p>  <p>Mi no ta ...</p>

**Tarea 1**

Kico bo ta mira?

- Lesa e frase den cada plachi.
- Busca un palabra den e rij akibou cu ta pas.
- Skirbi e palabra den e frase den bo buki di tarea.

**Tarea 2**

Bo sa e contesta?

- Na kico bo por mira cu bo cacho ta contento ora bo yega cas?
- Dicon nos ta yama un cacho fiel?
- Ki ora nos ta yama un hende un buscado di pleito?

• haci bon

• manso

• pleita

## 5 Pensa bon

### 5h Formulacion di frase

- Lesa e palabranan akibou.
- Traha frase cu e palabranan.

Hacie asin'aki:

*bon – amigo → Curt ta un bon amigo di Nina.*

1. hunga – cu otro
2. parti – tur cos
3. tristo – consola
4. pleita – amiga
5. exclui – otro mucha
6. duna – un brasa

### 5i Cua palabra no ta pas?

- Cua palabra no ta pas den e rij?
1. papa – tata – papi – primo
  2. tanchi – tanta – papi – tantan
  3. amigo – amiguito – amiga – ami
  4. mama – mayor – mami – mamay


### 5j Yena un verbo

- Completa e frasenan.
- Scoge for di e verbonan tras di cada frase.

1. Lily cu Tico ta ... man di otro.
2. Bo mester ... bo amigo cu cariño.
3. E amigonan ta ... te lora abou.
4. Mi amiga a ... mi un secreto.

- brasa – duna – tene  
duna – tene – trata  
gaña – hari – papia  
brasa – conta – papia





### 5k Busca palabra cu parce otro

- Lesa e frase bon.
- Scoge e palabra cu bo por uza na luga di e palabranan *cursiva* den e frase.
- Skirbi e palabranan cu ta pas cu otro den bo buki di tarea.

Bo por scoge entre:

contento – grandi – mayornan – propio – stima

### Mi wela

1. Tur siman mi ta bishita mi wela *keri*.
2. Mi *mama cu mi tata* ta hiba mi cerca dje.
3. Mi wela ya ta hende *di edad*.
4. Pero e ta biba na su *mes* cas.
5. Tur ora e ta *alegre*.

bon – chansa – caricia – stima – tarheta

6. Mi wela gusta haci *wega* cu mi.
7. Tambe e ta *pasa man riba* mi cabes.
8. Mi *tin amor pa* mi wela.
9. Ta p'esey awe mi ta traha un *carchi* p'e.
10. E ora ey e ta sinti su mes *feliz*.



**6 Skirbi bon**

**6h Busca tur palabra cu e cluster spr**

- Busca tur palabra cu e cluster *spr* y skirbi nan den bo buki di tarea.

Mi tin un matras di spring.  
Tin biaha mi ta bula riba dje.  
Ta manera cu mi ta bula riba un trampolin.  
Hopi halto mi ta bula.  
E spreï di mi cama ta bruha un tiki so.


Awasero ta fingui henter dia.  
Tur mata ta muha.  
Papi no tin nodo di sproei e matanan.  
Despues di un par di dia  
tur mata ta spreit.  
Tur caminda bo ta mira sprichi sali.  
E sprinzjeri den e pochi di mata  
tambe ta bira bunita.

**6i Cua palabra ta pas?**

- Skirbi tres palabra cu ta pas cerca e palabranan akibou.
- Pone atencion y skirbi sin fout.

1. amiga – ... – ... – ...
2. curason – ... – ... – ...
3. wela – ... – ... – ...
4. fiesta – ... – ... – ...





## 6j Un carchi di invitacion

- Akibou tin un tarheta di invitacion.  
E prome dos frasenan ta bon,  
pero e resto di frasenan a bruha un tiki.
- Lesa e tarheta y pone e frasenan corectamente bou di otro.
- Traha e tarea den bo buki di tarea.
- Dorna bo tarheta nechi cu plachi.



*Invitacion*

*Fanny, con ta bay?*

*Mi tin gana di bira bo amigo.  
Bo kier bin pasa dia cerca mi?  
Atardi nos ta hiba bo cas bek.  
Diasabra nos no tin scol.  
Corda bin cu bo zwempak.  
Mami di cu nos ta bay landa.*

*Bo amigo Andy*



### 1 Scucha y papia


#### E garoti blanco

Un hende cu ta ciego no por mira nada.  
Tin biaha un hende ciego ta uza  
un palo blanco special ora e ta cana.  
Un palo asina nos ta yama garoti.  
Cu e garoti ey e hende ciego  
ta bati riba caminda.  
Asina e ta tende y fula unda tin stupi,  
unda stupi ta caba y unda tin cos den  
caminda.

Otro caminda tin hende ciego cu tin  
un cacho guiado.  
Esey ta un cacho special cu ta yuda  
hende cu no por mira.  
Kico asina un cacho guiado ta haci?

- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba di contesta e preguntanan cu bo maestra/o ta haci awor.





## 2 Mi por lesa

*Continuacion di e cuenta*

### Wega di kiniki

Bel ta bati y e muchanan tin cu bay bek den klas.

Layo, Nico y Manuel ta wak rabia.

Cu cara serio nan ta bay sinta den nan banki.

“Ta kico a pasa, muchanan?”,  
Meneer Ovito, nan maestro, ta puntra.

Nico ta cuminsa conta.

“Meneer, nos tabata hunga kiniki.  
Manuel cu mi tabata hunga masha bon.  
Layo tambe tabata kier un wega.  
Prome nos no tabata kier,  
pasobra semper e ta pleita.

Ora Layo a priminti cu e lo no pleita,  
nos a lag’e hunga numa.

Pero Layo no ta sigui regla di wega.”

“Si”, Manuel tambe ta bisa,

“el a para nos wega!”

“Ta berdad, Layo?”, meneer ta puntra.

“Si, Meneer”, Layo ta bisa pocopoco y  
cu awa na wowo.

“Mi kiniki no a cay den e ronchi.

Ta p’ese y m’a pone mi kiniki aden cu mi man.

Mi no kier perde mi kinikinan.”

“Layo”, Meneer Ovito ta bisa,

“den wega bo mester sigui regla.

Tin biaha abo ta gana.

Tin biaha otro ta gana.

Si bo sigui pleita,

niun mucha no kier hunga cu bo mas.”

Esey si Layo no kier.

E no kier keda sin amigo.

E ta cana bay cerca Manuel cu Nico.

Layo ta duna nan un man y e ta bisa nan:

“Sorry cu m’a pleita.

Boso ta mi amigo.

Tuma mi saco di kiniki.”

“No, Layo”, Nico ta bisa,

“tene bo saco di kiniki.

Mañan nos ta bolbe hunga.”

“Danki”, Layo ta bisa.

“Mi no ta pleita nunca mas.”

Nico cu Manuel ta lanta for di nan stoel  
y e tres amigonan ta brasa otro.





### 3 Bo a comprende?

- Lesa e cuenta prome.
- Despues contesta e preguntanan.

#### Pregunta

1. Kico Meneer Ovito a puntra e muchanan ora nan a drenta klas rabia?
2. Ken a cuminsa conta?
3. Kico Layo a conta Meneer Ovito?
4. Kico Meneer Ovito a bisa Layo ora el a caba di conta?
5. Layo kier haci bon atrobe. Kico e ta bisa Manuel cu Nico?
6. Manuel cu Nico ta tuma e saco di kiniki di Layo?
7. Kico Nico ta bisa Layo?
8. Dicon Nico cu Manuel ta lanta for di nan stoel?
9. Bo a yega di keda rabia cu un hende? Dicon?
10. Cua otro palabra nos por bisa en bes di sorry?

#### 4 Vocabulario

##### Louis

Hopi tempo pasa den un pais masha leu for di aki, a nace un mucha homber chikito.

E mucha su nomber tabata Louis: Louis Braille.

E tata di Louis tabata traha siya pa cabay.

Semper bo tabata haya Louis cerca su tata den shop.

Un biaha Louis su tata no tabata na cas.

Louis a bay hunga su so den e shop.

E dia ey a sosode un desgracia.

Louis a herida un wowo cu un cuchiu cu e tabata hunga cu ne.

E no por a mira mas cu e wowo ey.

Louis tabatin masha mala suerte.

Algun tempo despues su otro wowo a bira malo y el a bira ciego.

Toch Louis no a keda sinta na cas.

El a sigui bay scol.

Su tata tabata su miho amigo y e tabata yuda Louis siña lesa.

Louis su tata tabata claba clabo riba un pida palo den forma di letter. Asina Louis por a fula e letternan y siña lesa.

Dia Louis a bira grandi, el a drecha e manera di lesa aki. Awor tur hende ciego ta siña lesa mescos cu Louis.

Nan tin buki diferente. Riba cada pagina tin bulto chikito den forma special.

Hende ciego ta pasa cu nan dede riba e bultonan y asina nan ta lesa. E manera di lesa aki nos ta yama braille.



##### Tarea 1

Kico bo ta mira?

Les a frase bou di cada plachi. Busca e palabra cu falta. Nan ta den e rij di palabra akibou. Skirbi e palabra den bo buki di tarea.

• asiel di bestia

• banchi di cacho

• cacho guiado



<p>1</p> <p>Mi ta mira un ...</p>	<p>2</p> <p>Mi ta mira un ...</p>	<p>3</p> <p>Mi ta mira un ... y un ...</p>
<p>4</p> <p>Mi ta mira un ...</p>	<p>5</p> <p>Mi ta mira un ...</p>	<p>6</p> <p>Mi ta mira un hende lesa ...</p>

## Tarea 2

Bo sa e contesta?

- Kico ta e diferencia entre un asiel di bestia y un tienda di bestia?
- Pakico bo ta uza un faha di cacho?
- Un cacho guiado ta yuda un hende ciego. Kico asina e tin cu haci?
- Bo ta kere ta dificil pa siña lesa braille? Dicon si of dicon no?

• faha di cacho

• garoti blanco

• letter di braille

• tienda di bestia

## 5 Pensa bon

### 5! Cua verbo bo ta yena?

- Den cada frase falta un verbo.
- Busca e verbo cu falta.
- Skirbi e verbo corecto den bo buki di tarea.

Bo por scoge entre:


haya – hunga – perde – pasa – traha

1. E tata di Louis tabata ... siya pa cabay.
2. Semper bo tabata ... Louis cerca su tata.
3. Un dia algo grave a ... cu Louis su wowo, ora el a bay ... su so den shop.
4. Louis a ... su bista.

claba – lesa – sigui – sinta – yuda

5. Louis no a keda ... na cas.
6. El a ... bay scol.
7. Su tata, cu tabata su miho amigo, a ... Louis.
8. Su tata a ... clabo chikito riba un pida palo den forma di letter.
9. Asina Louis a siña ...





### 5m Den cua kolom bo ta pone e palabra?

- Tin number pa bestia, hende y cos.
- Lesa e frasenan bon.
- Pone e palabranan cursiva den e kolom corecto.
- Wak e ehempel.

#### Hende Bestia Cos

Mila a pone e *turtuga* den e *baki*. Mila *turtuga* baki

- Haci mescos cu e frasenan akibou.
1. *Terry* ta bisti su *cacho* un *banchi*.
  2. E *trupial* ta canta bou di *Elsa* su *bentana*.
  3. *Lara* a mira un *cacalaca* den su *tas*.
  4. E *pushi* kier drumi riba *cama* di *Ben*.



#### 5m Kico bo ta yena?

- Den cada frase falta un palabra.
- Busca akibou e palabra cu falta.
- Skirbi tur frase den bo buki di tarea.
- Bo por scoge for di:

*manera – ora cu – pa – pasobra – prome cu*

1. Hubert ta drecha su *camber*, ... Tony ta bin cerca *dje*.
2. E kier ... su *amigo* pasa bon.
3. Hubert ta bira contento, ... Tony *yega*.
4. Tony ta habri su *maleta*, ... e drenta den *camber*.
5. E mester cambia su *pañã*, ... nan bay *hunga*.



## 6 Skirbi bon

### 6k Busca palabra

- Lesa e prome y e di dos texto.
- Tin varios palabra cursiva.
- Skirbi den bo buki di tarea solamente e palabranan cursiva cu ta mescos den texto 1 y 2.

#### 1 E cacho guiado

E *bisiña* di Mimi ta *ciego*.  
Ta *p'esey* e tin un cacho.  
Un cacho *guiado* cu tin su *banchi* y su *faha*.  
Semper e *bisiña* di Mimi  
ta sali *keiro* cu su cacho.  
E cacho ta *mustr'e* e *caminda*.  
E ta su *miho amigo*.



#### 2 Un cacho special

Hopi hende *ciego* tin su *cacho guiado*.  
Un cacho guiado sa cu ora  
e tin su *faha* y su *banchi bisti*  
e tin cu traha pa su *doño*.  
E ta yuda y *mustra caminda*  
ora su *doño bay keiro*.  
E cacho ta un bon *amigo*.



+



- liña =



## 7 Tarea varia

### 7a Rima

- Prome bo maestra/o ta lesa e rima.
- Bo ta scucha bon!
- Despues bo mes ta purba lesa e rima.
- Bo por conta kico bo a lesa?
- Awor hunto cu bo maestra/o bo ta purba memorisa e rima.



### Mi amiga

Mi amiga Kaydie a haci aña.  
El a bisti un bunita paña.  
E cura ta tur decora.  
Cu slinger y blaas cora.

Maske ta den solo,  
nos ta canta rond di e bolo.  
Y den bos duro nos ta grita  
Hip, hip, hura!

### 7b Bo mes por rima awor?

- Busca cada bes dos palabra cu ta rima.
- Skirbi nan den bo buki di tarea.



dushi	–	pushi
gosa	–	tosa
brasa	–	casa


1.	...	–	2.	...
1.	...	–	2.	...
1.	...	–	2.	...



### 1 Scucha y papia

#### Combersacion den kring

- Awe nos ta papia den kring.
- Nos ta papia tocante *comedia*.
- Kico ta comedia?
- Abo a yega di wak un comedia?
- Bo por conta nos algo di e comedia ey?
- Ken a yega di actua den un comedia?
- Ki rol bo tabatin?



**Regla di combersacion**

*Nos ta pidi palabra.*

*Ora nos kier papia, nos ta hisa man pa haya turno.*

## 2 Mi por lesa

### Boton, e kabouter sneiro pichiri

*Kabouter Pam, kabouter Devy y hadita Suzy ta sinta bou di un palo. Henter dia nan a traha duro bende pan.*

*Nan ta warda kabouter Pepo y kabouter Toby cu ainda no a bin bek.*

Pam: Unda Pepo cu Toby a keda?

Devy: Nan mester a yega caba.

Suzy: Ata nan ta bin aya!

Pam: Con ta Pepo, con ta Toby?  
Dicon boso a tarda asina?

Pepo: Nos a bay bende pan cu Boton, e kabouter sneiro pichiri.

Toby: El a tuma un saco cu dies pan.  
Despues el a dal e porta di su cas cera.

Pepo: Casi el a kita Toby su nanishi afo. E no a paga nos tampoco.

Pam: Ta kico esey?  
E cos aki no por keda asina.  
Nos mester duna Boton un bon les.

Suzy: Con nos ta bay haci esey?

Pam: Awe nochi nos ta bay sconde su skernan. Un sneiro no por traha sin su skernan.  
Laga nos tur ban cas.  
Nos ta topa mas laat.

*E kabouter nan y e haditanan ta para den scur na cas di kabouter Boton.*

*Pepo ta bay tira un bista na e bentana.*

*Despues di un rato e ta bin bek.*

Pepo: Boton ta morto na soño.

Pam: Esey kiermen cu nos por drenta.

Corda bon cu nos no ta kibra nada.

Devy: Nos ta sconde su skernan so.

Suzy: Anto nos ta bruha su bolnan di hilo.

Pam: Laga nos ban paden.

Pepo: Mi a mira e baki di hilo riba mesa.

Toby: Su skernan si ta den un macutu. Nos mester haci keto keto pa Boton no lanta for di soño.

Pepo: Ay!

Suzy: Kico a pasa bo, Pepo?

Pepo: Mi a dal mi dede di pia duro!

Pam: Sst, Pepo, si bo haci desordo, Boton ta lanta for di soño.

Toby: Manera e ta ronca ey, ta te otro mañan e ta lanta.

Devy: Boso tin tur cos?

Pepo: Si, ami tin e skernan.

Boton: Sker? Cua sker?

*E comedia ta continua.*



### 3 Bo a compronde?

- Lesa e comedia prome.
- Despues contesta e preguntanan.

#### Pregunta

1. Dicon Pepo cu Toby a tarda asina hopi?
2. Kico Boton, e sneiro pichiri, a haci ora el a haya su saco cu pan?
3. Kico Pam kier bay haci pa duna Boton un bon les?
4. Ken ta bay wak si Boton a pega soño caba?
5. Kico e kabouteranan kier haci cu e skernan di Boton?
6. Kico hadita Suzy kier haci cu tur e bolnan di hilo?
7. Na unda e baki di hilo ta?
8. Unda e skernan ta?
9. Kico a pasa Pepo?
10. Boton ta lanta for di soño?

## 4 Vocabulario

### E prinses y e dragon chikito

*Eric y Marlin ta wak un poster.*

*E poster ta propaganda pa un comedia.*

*E comedia ta di un prinses y un dragon chikito.*

*Marlin ta actua den e comedia.*

Marlin: Bo ta bin wak nos comedia?  
Ami ta hunga pa prinses. Mi ta actua den henter e comedia, casi mi no ta baha mes for di podium.

Tin un dragon cu ta cana tur caminda mi tras.

Eric: Kico e dragon kier anto?

Marlin: Sst, no conta niun hende, pero e dragon kier un sunchi di mi.

Eric: Ha, esey si ta pret.  
Anto ki bo ta haci?

Marlin: Si bo kier sa ki mi ta haci, bo mes mester bin wak.

Nos comedia ta masha pret.

Bo ta hari te yora. E otro actor ta un dragon.

Eric: E, e, awor si bo a haci mi caweta. Mi ta bin sigur pa mi tambe duna aplauso na final.

### Tarea 1

- Lesa e frase bou di cada plachi.
- Busca e palabra cu falta. Nan ta den e rij di palabra akibou.
- Skirbi e palabra den bo buki di tarea.

### Tarea 2

Bo a yega di bay un teatro?  
Kico bo a mira den e teatro?

- Skirbi e contestanan den bo buki di tarea.

### Tarea 3

Marlin ta bisa Eric:

“Nos comedia ta masha pret.  
Bo ta hari te yora.”

Abo tambe a yega di hari te yora?


- Skirbi den bo buki di tarea dicon bo a hari te yora.
- Traha un bunita pintura acerca.



• actor

• aplauso

• comedia




1



Mi ta mira un ...

2



E ... ta grandi.

3



No tin ningun hende riba ...

4



Mi ta wak un ... pret.

5



E ... ta actua bon.

6



Bunita!  
Nos ta duna un ... formal.

• podium

• poster

• teatro

### 5 Pensa bon

#### 5a Puzzel

- Lesa e frase y pensa e palabra cu mester yena.
- Skirbi e palabra den bo buki di tarea.
- Den e hokinan shinishi bo por lesa un palabra di ariba bay abou
- E palabra ta ...

	1						
	2						
	3						
4							
5							


1. Batimento di man nos ta yama ...
2. Marlin ta actua den un ...
3. Un edificio unda bo por mira un comedia ta un ...
4. Un plachi grandi di propaganda ta un ...
5. E ... ta actua hopi bon den e comedia.

#### 5b Cambia e frasenan

- Lesa e frasenan.
- Purba cambia nan awor.
- Cuminsa cu e palabra cursiva.

1. Awe *Marlin* ta bay teatro.
2. E ta un prinses *den e comedia*.
3. Seis or *su tata* ta hib'e.
4. Pafo di e teatro *tin* hende para.
5. Eric, su amigo, *tambe t'ey*.
6. E comedia ta *masha pret*.





### 5c Kico bo ta yena?

Den cada frase falta un palabra.

- Busca e palabra cu falta den e rij akibou.
- Skirbi e palabra corecto den bo buki di tarea.

Bo por scofe for di:

despues cu – y – ma – of – pa – p'esey

### Na teatro

1. Eric ta bay teatro ... wak e comedia.
2. E ta cumpra carchi di entrada ... ta drenta mesora.
3. Eric ta pensa: sinta dilanti ... patras?
4. Patras ta dushi, ... dilanti mi por wak miho.
5. ... luz paga, e cortina ta habri.
6. E comedia ta pret, ... Eric ta bati man.




### 5d Tur cos a bruha

Eric y Marlin a hunga den sala.

Nada no a keda na nan luga.

Mami ta bisa: "Ban mira muchanan, pone tur cos bek na nan luga."

- E stoel ta para aya, pero e stoel mester ta aki.
- E lampi ta para ..., pero e lampi mester ta ...
- E vaas ta para ..., pero ...
- E copi ta ..., pero ...



### 6 Skirbi bon

#### 6a Cua palabra bo ta mira?

Ufff, ta kico a pasa?

Tur palabra a pega na otro.

- Separa e palabranan.
- Traha e tarea aki den bo buki di tarea.



Ehempel:

scuchagosahari = scucha + gosa + hari

teatropodiumcomedia = ... + ... + ...

actoraplausopublico = ... + ... + ...

posterprinsesdragon = ... + ... + ...

sunchibrasacaricia = ... + ... + ...

#### 6b Parti palabra den silaba

- Parti e palabranan den e rijnan akibou den silaba.
- Bisa e silabanan na bos halto prome.
- Skirbi e palabranan den bo buki di tarea.
- Hacie asina: forki → for-ki

actor

buki

dragon

poster

zjeito

vakantie

garganta

barbulet

aplauso

tamarein

edificio

buladeifi

propaganda

peligroso

television





### 6c Mensahe

Eric a bishita e comedia di e prinses y e dragon chikito. El a gosa di e comedia.

Na salida tin un buki di invitado. Eric ta dicidi di skirbi un mensahe. Ata aki un parti di e buki di invitado. Abou bo ta mira Eric su number y su fam.

- Yuda Eric caba di skirbi e mensahe.
- Uza cada bes e dos palabranan aki den un frase.  
gusta – comedia  
pañá – bunita  
actua – bon  
hari – pret



Awe mi a bay wak un comedia.  
E comedia di e prinses y e dragon.  
Mi a *gusta* e *comedia*.

.....  
.....  
.....

Eric Maduro



### 1 Scucha y papia

#### Raton den klas

Juffrouw Vicky ta pasa banda di klas di meneer Norman.


E ta tende harimento duro y e ta para pa mira ta kico ta pasando. Su wowonan ta habri hancho hancho, ora e mira Milly y Raiza para riba un banki.

Ta kico ta pasando?

Ta unda meneer Norman ta?

- Awor bo ta bay scucha e cuenta.
- Scucha bon!
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.





## 2 Mi por lesa

*Continuacion di e comedia*

### **Boton, e kabouter sneiro pichiri**

*E desordo cu Pepo a haci,*

*a lanta Boton for di soño.*

*E ta cende luz.*

Boton: Ta ken boso ta?

Kico boso ta haci den mi cas?

Pepo: Boton, bo no ta corda mi?

Boton: Um, n' ta abo a bende mi pan awe?

Pepo: Si, anto bo no a paga atrobe. Nunca bo no kier saca placa.

Boton: Si, um, no ...

Pam: Ta p'esey mes nos ta aki.

Nos a bin pa duna bo un les.

Nos ta bay sconde bo skernan.

Tanten cu bo no paga e pannan, bo no ta haya bo skernan bek.

Boton: Por favor, no bay cu mi skernan.

Pam: Boton, bo a tende kico mi a bisa?

Tanten cu bo no paga e pannan, bo no ta haya bo skernan bek.

Boton: Por favor no haci e cos ey.

Mi tin cu cose un bachi nobo pa Rey Tito, nos rey di kabouter.

Pam: Rey Tito? Bachi nobo?

Boton: Si, mañan tin un fiesta na palacio.

Rey Tito kier bisti un bachi nobo.

Ami tin cu cos'e y ainda mi no

ta cla. Boso por yuda mi caba cu e bachi?

Pepo: Bo a lubida cu bo a hera kita Toby su nanishi afo ora bo a dal e porta cera awe merdia?

Boton: Despensa, despensa. Mi tabata asina nervioso y e ora ey mi ta haci cos sin pensa.

Pam: Ta p'esey bo a keda sin paga e pannan?

Of ta cos di pichiri bo tabata haci atrobe manera semper?

Boton: No, e biaha aki si no.

Ta nervioso so mi tabata.

Boso mester kere mi.

Pam: Bo ta priminti cu ora bo caba, bo ta paga e pannan?

Boton: Si, mi ta priminti esey.

Boso pan ta masha dushi.

Pam: Bon, amigonan, laga nos pordona Boton.

Laga nos ban dun'e un man

pa e caba e bachi di nos rey na tempo.

Pepo, bay coy e skernan y Toby y Suzy, cuminsa los e hilonan.

Boton, nos ta priminti bo cu prome cu mainta habri e bachi ta cla.

Boton: Masha masha danki.

Mi ta priminti un biaha mas cu nunca mas lo mi no trata boso malo.





### 3 Bo a compronde?

- Lesa e cuenta prome.
- Despues contesta e preguntanan.

#### Pregunta

1. Kico Boton ta bisa ora e mira e kabouteranan?
2. Kico Pepo ta bisa Boton?
3. Kico Pam ta bisa? Dicon nan kier bay sconde e skernan?
4. Pakico Boton no kier pa nan bay cu su skernan?
5. Dicon Boton a trata e kabouteranan malo merdia?
6. Kabouter Boton no a paga e pannan, pasobra e ta pichiri of tin un otro motibo dicon e no a paga?
7. Kico a pasa cu Boton no a paga?
8. Kico nan ta bay haci pa Boton?
9. Kico Boton ta priminti e kabouteranan?
10. Abo a yega di sinti bo nervioso? Kico bo a sinti e ora? Pakico bo a bira nervioso?



#### 4 Vocabulario

*Benny y Tico ta dos popchi den un cashi di popchi.*

#### **E leon cu a perde**

Benny: Tico, bo a tende caba?

Tico: Tende kico?

Benny: Nan a perde un leon.

Tico: Kico bo kiermen?

Ken a perde un leon?

Benny: Parke di bestia.

Un leon a disparce.

Nan no por hay'e niun caminda.

Tico: No haci wega.

Awor nos no por sali nunca mas for di e cashi di popchi aki.

Benny: Stop di papia co'i kens.

Awor mes mi ta bay wak pafó si mi ta mira e leon.

Ami si no tin miedo.

Tico: Mi no gusta e idea ey.

Kico bo ta haci si bo haya bo cu e animal feroz ey?

Benny: Keda tranquil, ruman.

Si mi topa e leon ey mi ta yama Parke di bestia.

Mi ta bay. Ayo.

Tico: Mi ta sinti mi masha nervioso.

Benny no ta comprende con peligroso un leon por ta.

Muchanan, boso por yuda mi yama Benny bek?

Tico: Benny, Beeeeny.

Benny: Dicon bo ta haci tanto desordo asina?

M'a bisa bo toch cu mi ta bay dal un keiro?

Tico: Bo a lubida cu tin un animal feroz ta cana eyfo cu por come bo?

Benny: Esey si ta bay ta un tiki difícil.

Tico: Dicon? Kico bo kiermen?

Benny: M'a caba di tende cu nan a haya e leon.

E tabata den su haula morto na soño den un palo halto. E no tabata perdi niun rato so.





1



Nan a verf e ...  
color oraño.

2



Mi ta mira un ...

3



E ... ta wak.

4



Ami gusta mira ...

5



Janshi cu Jenshi ta  
dos ...

6



Tur cinco ... ta otro.

### Tarea 1

Cua palabra falta den e frase?

- Lesa e frase bou di cada plachi.
- Busca e palabra cu falta. E palabranan ta den e rij di palabra akibou.
- Skirbi e palabra den bo buki di tarea.

### Tarea 2

Bo sa e contesta?

Kico ta e diferencia entre un popchi di man y un popchi di dede?

Kico ta e diferencia entre un popchi di man y un marioneta?

### Tarea 3

Kico bo mester pa un teatro di popchi?

- Skirbi e palabranan den bo buki di tarea.

• popchi di man

• publico

• teatro di marioneta

### 5 Pensa bon

#### 5e Cua palabra bo ta yena?

Den cada frase falta un palabra.

- Busca e palabra cu falta.
- Skirbi e palabra corecto den bo buki di tarea.

bo – boso – mi – nan – nos – su

1. Mi tata ... auto no kier start.
2. E alumnonan ta traha e tarea den ... schrift.
3. Mi mes por mara feter di ... keds.
4. Wak, Pedro, ... sapato ta sushi.
5. Mi ruman cu mi tin ... mes camber.
6. John cu Elma, ... Mama ta warda boso.



#### 5f Cua palabra bo por uza?


Den cada frase falta un palabra.

- Busca e palabra cu falta.
- Skirbi e palabra corecto den bo buki di tarea.

esayanan – esakinan – esey – eseynan

1. Esaki ta mi buki y ... ta su buki.
2. ... ta mi stiftnan y ... ta su stiftnan.
3. Esaki no ta bo stoel, ... ta bo stoel.
4. Esakinan ta mi kinikinan, ... ta di Juny y ... ta di Beto.





### 5g Yena e palabra corecto

- Den cada frase falta un palabra.
- Busca e palabra cu falta.
- Skirbi e palabra corecto den bo buki di tarea.

dedenan – liña – marioneta– special

### Mi fiesta

1. Dia mi haci aña lo tin teatro di ...
2. Marioneta ta popchi ...
3. Bo ta laga nan move y balia cu ...
4. Bo mester por move bo ... bon si.

canta – popchi di dede – show – wak

### Popchi chikito

1. Pa cada dede mi tin un ...
2. Cu mi popchinan mi ta duna un ...
3. Mi ta laga nan papia y ...
4. Bo tambe ta bin ...?

### 5h Bo ta corda?

“Mi ta haci aña na luna di maart”,  
Ana ta bisa.

“Na ki luna abo ta haci aña, Roslin?”

“Na juni”, Roslin ta contesta.

- Ana ta haci aña na maart y Roslin ta haci aña na juni.

Bo ta corda number di e lunanan?

Menciona nan awor.

- Na ki luna abo ta haci aña?




## 6 Skirbi bon

### 6d Yena e leternan corecto

- Tur palabra falta un of mas letter.
- Busca e leternan cu falta den e blaasnan akibou.
- Skirbi e palabranan corecto den bo buki di tarea.

1. cashi di ..pchi.
2. marione..
3. ..tor
4. comed..
5. ..blico
6. fun..on
7. ..atro
8. pod..m
9. apl..so
10. po..er



### 6e Rima

- Bo ta bay completa un rima.
- Lesa e rima bon y skirbi un palabra cu ta rima y cu ta pas.
- Skirbi e rima sin fout den bo buki di tarea.

### Pushi cu raton

Un pushi masha pulushi  
a puntra un raton: “Bo ta du...?”  
Pober raton a spanta  
grita, bula lan...

Core limpi bay  
pone pushi hera c...  
Awor e ta busca un raton  
cu no por core asina b...



### 6f Lesa y skirbi

- Lesa e frasenan akibou bon.
- Skirbi e palabranan cu tin un color, nechi y sin fout den bo buki di tarea.

1. Bo sa cu Nina tin un **cash** di **popchi**?
2. Tur popchi den e **cash** ta **popchi di man**.
3. Nina ta laga nan **move**.
4. Esey e ta haci cu su **man**.
5. Nina ta laga nan **papia**.
6. Tin bes e popchinan ta **balia**.



### 6g Dictado

- Awor bo ta bay scucha un dictado.
- Bo maestra/o ta ripiti e palabranan cu abo tin cu skirbi.



### 1 Scucha y papia


#### Combersacion den kring

- Awe nos ta papia den kring.
- Nos ta papia tocante diferente sorto di comedia. Tin comedia cu hopi musica y cantamento, tin comedia cu hende sa hunga riba caya so, tin comedia cu popchi, tin comedia cu seña so y hopi otro sorto di comedia mas.
- Ki *sorto* di comedia abo a yega di wak?
- Bo kier conta nos con e comedia ey a bay?
- Na unda abo a yega di wak un comedia?

#### Regla di combersacion

*Nos ta papia cla pa tur hende por tende y componde nos bon.*





**2 Mi por lesa**

**Les di siña hunga comedia**

1



Tur hende gusta scucha cuenta.  
Mucha chikito y hende grandi  
tambe.  
Nos por conta un cuenta for di un  
buki.  
Nos por presenta un cuenta tambe  
den forma di un comedia of un  
pelicula.  
E ora ey nos ta bira actor of actriz.

2



Si bo kier bira actor of actriz, bo  
mester practica prome.  
Bay para dilanti di un spiel y traha  
poco cara.

4



Bo por haya diferente rol den un  
comedia.  
Si bo ta un shon bieu, bo tin cu  
tembla un tiki.  
Bo mester siña cana pocopoco,  
mientras cu bo ta tene bo garoti.

5



Si bo tin e papel di un payaso, bo  
tin cu laga hende hari.  
Bo mester haci tur sorto di kenshi  
y conta chasco.



3



Prome bo ta wak tristo.  
 Haci manera ta bo cacho  
 a bay for di cas.  
 Despues bo ta wak contento.  
 Haci manera bo a haya un  
 regalo masha bunita.

6



Tin hopi otro rol mas.  
 Ki rol abo lo kier den un comedia?  
 Corda cu bo mester siña bo texto  
 for di cabes.  
 Si bo actua bon, tur hende cu ta bin  
 wak, ta gosa di bo actuacion.

### 3 Bo a compronde?

- Lesa e les prome.
- Despues contesta e preguntanan.

#### Pregunta

1. Nos por conta cuenta for di un buki. Den ki otro forma nos por presenta un cuenta?
2. Kico bo tin cu haci si bo kier bira actor of actriz?
3. Riba kico bo por pensa si bo kier wak tristo?
4. Riba kico bo por pensa si bo kier wak contento?
5. Con bo tin cu hunga e rol di un shon bieu?
6. Kico bo tin cu haci si bo ta hunga pa un payaso?
7. Kico bo mester haci semper ora bo haya un rol den un comedia?
8. Ki rol abo lo desea di hunga den un comedia? Dicon e rol ey?

## 4 Vocabulario

### Un sorpresa

Awe juffrouw ta smile, ora e muchanan drenta den klas.  
 “Mi tin un sorpresa!”, e ta bisa.  
 “Ken por rey kico e ta?”  
 “Ami!”, Ricky ta bisa.  
 “Ay no, juffrouw, ami!”, Isha ta grita.  
 Juffrouw ta duna turno.  
 Pero niun hende no ta rey bon.  
 Juffrouw ta hari:  
 “Awe nos ta bay wak un comedia”, e ta bisa.  
 “Awor boso por rey ki tipo di comedia e ta.”  
 “E ta un obra musical?”,  
 Tico ta puntra.  
 “No, ami sa! Ta un comedia di hada!”, Ali ta bisa.  
 “Por ta nos ta bay wak teatro di caya, juffrouw?”, Shaky ta puntra.  
 “No, Shaky”, juffrouw ta contesta cu un cara misterioso.  
 “Te ainda niun mucha no a rey bon!”  
 “Mi ta conta boso kico nos ta bay haci. Awe nos ta bay scol di mucha sordo.  
 E muchanan ta bay presenta pa nos. Nan ta bay presenta un pantomina. Esey ta un comedia cu seña. Nan no ta papia.”

Ora bus yega, tur alumno ta drenta ansioso.

Nan tin gana di wak e comedia special aki.

### Tarea 1

Kico bo ta mira?

- Lesa e frase bou di cada plachi.
- Busca e palabra cu falta. Nan ta den e rij di palabra akibou.
- Skirbi e palabra den bo buki di tarea.

### Tarea 2

Bo sa e contesta?

- Den un obra musical e actornan ta actua, ta papia, ta ... y ....
- Pantomina ta un comedia cu ...

### Tarea 3


Abo tambe kier bira actor of actriz?

- Skirbi den bo buki di tarea dicon si of dicon no.

• comedia

• comedia pa mucha

• novela



1



Rino y Jenny ta hunga den un ...

2



Mi ta bay un ...

3



Na Cas di Cultura nan ta presenta un ...

4



Mama ta wak un ... na television.

5



Mi ta para wak un ...

6



Hopi hende ta para wak un ...

• obra musical

• pantomina

• teatro di caya

## 5 Pensa bon

### 5i Traha palabra

- Cua palabra nobo bo por traha ?
- Uza cada bes e mesun letternan.
- Wak e ehempelnan prome y traha e tarea den bo buki di tarea.

post      stop \_\_\_\_\_      plak      klap \_\_\_\_\_

arca      \_\_\_\_\_      bais      \_\_\_\_\_

boto      \_\_\_\_\_      laba      \_\_\_\_\_

tapa      \_\_\_\_\_      saco      \_\_\_\_\_

Baca      \_\_\_\_\_      ñapa      \_\_\_\_\_




### 5j Cua palabra *no ta pas*?

- Cua palabra *no ta pas* den e rij?
- Skirbi e palabranan cu si ta pas den bo buki di tarea.

comedia – actriz – actor – pizza  
cantante – buki di lesa – cantica – piano  
teatro – pantomina – podium – pen  
musica – radio – instrument – bril





### 5k Caba e frase

- Lesa e prome frase.
- Purba traha e otro frasenan di e mesun manera.

1. Mi welo *no tin* auto, pero mi wela *si tin* auto.
2. Den camber *no tin* mesa, pero den sala ...
3. Den lachi *no tin* vaas, pero den cashi ...

- Bo mes por awor?

4. Ami ... popchi, ... ruman muhe ...
5. Riba mesa ... tapijt, ... suela ...
6. Den frishider ... saya, ... wasmashin ...



### 5l Palabra cu tin relacion cu otro

- Den cada rij bo ta mira tres palabra.
- Skirbi den bo buki di tarea di con e palabranan aki ta pas cu otro.

Hacie asina:

blenchi - chuchubi – prikichi: *parha*

mango – papaya – patia: ...

pargo – masbango – sardin: ...

cama – cashi – lessenaar: ...


fio – piano – trompet: ...

kool – bonchi – wortel: ...

cayena – rosa – trinitaria: ...

cacalaca – muskita – sangura: ...

leon – puma – tiger: ...



## 6 Skirbi bon

### 6h Mayusculo y signo di lesa

- Bo ta corda ainda?  
Ora ta skirbi frase, mester uza mayusculo y signo di lesa.
- Lesa e frasenan akibou bon.
- Bo ta mira kico falta den e frasenan?
- Drecha e frasenan y skirbi nan den bo buki di tarea.

1. ken no conoce lulu
2. e gusta hunga comedia
3. un dia e ta un actriz bunita
4. un otro dia e ta un heks fastioso
5. mi ta kere cu e por hunga e rol di un lora tambe
6. lulu su boca no por para keto
7. cuidou pa bo no bisa lulu si

### 6i Cua palabra ta pas acerca?

- Skirbi tres palabra cu ta pas cu e palabra akibou.
- Pone atencion y skirbi sin haci fout den bo buki di tarea.

1. teatro – ... – ... – ...
2. comedia – ... – ... – ...
3. popchi di man – ... – ... – ...





### 6j Kico bo ta mira?

- Wak e plachinan bon.
- Kico bo ta mira?
- Skirbi dos frase bou di cada plachi.
- Traha e tarea den bo buki di tarea.



---

---

---

---



---

---

---

---

## 1 Scucha y papia

### Dos artista

“Muchanan, stop di haci co’i kens!”,  
Mama ta bisa Lulu y su amiga Zany.


“Pero, Mama, nos tin cu practica dilanti di spiel”,  
Lulu ta bisa.

“Otro siman nos ta bay hunga comedia pa nos  
amigonan. Den e obra nos ta dos actriz cu a  
yega teatro laat.”

“Esta bon”, Mama ta bisa cu un cara hari.  
“Mi tambe por bin wak boso obra?”

- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba di contesta e preguntanan cu bo  
maestra/o ta haci awor.





## 2 Mi por lesa

### Olifante Dik

Olifante Dik tin masha gana di hunga futbol.

Tur diadomingo e ta bay wak wega cu Papa Olifante.

“Ora mi bira un tiki mas grandi, mi ta bira keeper”, e ta conta su tata.

Un dia Papa kier a dun’e un sorpresa grandi.

“Dik”, Papa ta bisa, “diadomingo awor bo por hunga den e wega di futbol den nos bario.”

Dik ta masha contento.

Siman no kier pasa lihe.

Henter ora bay e ta pensa riba e wega di futbol cu ta bay tuma luga.

Diasabra mainta e ta bay Playa cu Mama Olifante pa cumpra sapato y paña di futbol.

Ora porfin diadomingo a yega, Dik ta e prome riba veld.

Pero ora wega cuminsa, tur cos ta bay robes.

Cada bes ora e bala bin den su direccion Dik ta grita asina duro cu tur futbolista tin cu cera nan horea cu nan pata.

Dik ta asina grandi y balente cu e ta basha tur otro hungado abou ora e core.

Y pa colmo e ta scop e bala asina duro cu e bala ta disparce for di veld.

“Asina nos no por hunga futbol”, e otro hungadonan ta keha.

“Asina wega di bala no ta dushi mas.”

E mesun atardi ey e trainer di e club di futbol ta bay papia cu Papa Olifante.

“Dik ta mucho grandi pa hunga futbol”, e ta bisa su tata.

“Miho e bay haci algo otro.”

Dik ta masha tristo.

“Kico otro mi por bay haci?”, e ta snik.

“Ta futbol mi gusta.”

Pero diripiente Mama Olifante ta haya un idea masha bon mes.

“Dik”, e ta bisa, “bo por grita asina duro. Dicon bo no ta drenta e brassband di nos bario?”

Y asina ta sosode cu Dik ta join e brassband.

Despues di un par di luna Dik ta e miho trompetista di bario.

Dik ta feliz di dje.

“Futbol ta dushi wega”, e ta bisa, “pero musica ta mi zjilea.”




### 3 Bo a compronde?

- Lesa e cuenta prome.
- Despues contesta e preguntanan.

#### Pregunta

1. Kico Dik cu su tata ta haci tur diadomingo?
2. Kico Dik kier bira ora e bira un tiki mas grandi?
3. Ki sorpresa Papa tin pa Dik?
4. Kico Mama cu Dik a bay cumpra na Playa?
5. Hopi cos tabata bay robes ora wega a cuminsa.  
Kico a bay robes?
6. E otro hungadonan tabata keha. Kico nan tabata bisa?
7. Ken a bay papia cu Papa Olifante?
8. Dicon Dik no por a hunga mas?
9. Cua idea Mama Olifante a haya?
10. Kico Dik a bira?
11. Kico abo lo kier bira ora bo bira mas grandi?



## 4 Vocabulario

### Sonny su rol

Klas 2 ta bay hunga comedia.  
Juffrouw Mena kier pa tur mucha  
participa.  
Ta Sonny so no kier.  
Sonny ta un tiki timido.


“Ta con nos ta haci awor?”,  
juffrouw ta puntra.  
“Bo tambe tin cu haya un rol,  
mescos cu tur otro mucha  
di e klas.”  
Juffrouw Mena ta pensa un rato.  
Despues e ta cuminsa hari.  
“Bo sa kico?”, e ta bisa,  
“mi tin un rol bunita pa bo.  
Abo por bira souffleur, Sonny.”

“Kico ta un souffleur, juffrouw?”,  
Sonny ta puntra.  
“Un souffleur ta yuda tur  
mucha cu tin un rol den e  
obra”, juffrouw ta splica.  
“E ta para tras di cortina riba podium.  
Niun hende no ta mir’e.  
E souffleur tin e buki cu tin e obra  
skirbi aden den su man.

Si un mucha no sa mas kico e tin cu  
bisa, e souffleur ta yud’e.

E ta lesa pocopoco  
kico e mucha tin cu bisa of  
kico e tin cu haci.”  
“E rol ey si mi kier, juffrouw”,  
Sonny ta bisa contento.  
“Mi kier ta souffleur.”  
Y cu un sonrisa grandi  
e ta cuminsa lesa den  
e buki di comedia.





<p>1</p>  <p>Pa wak comedia bo mester cumpra un ...</p>	<p>2</p>  <p>Carchi bo ta cumpra na ... cerca e ...</p>	<p>3</p>  <p>Ora e obra cuminsa, e ... ta habri.</p>
<p>4</p>  <p>... grandi ta cende.</p>	<p>5</p>  <p>Riba podium mi ta mira e ...</p>	<p>6</p>  <p>Tras di cortina tin un ...</p>

### Tarea 1

Kico bo ta mira?

- Lesa e frase bou di cada plachi.
- Busca e palabra cu falta. Nan ta den e rij di palabra akibou.
- Skirbi e palabra den bo buki di tarea.

### Tarea 2

Bo sa e contesta?

- Sonny ta un tiki timido. Kico bo no ta risca di haci ora bo ta timido?  
Skirbi esey den bo buki di tarea.
- Sonny ta haya e rol di souffleur. Bo tambe kier un rol asina?  
Splica dicon si of dicon no.

## 5 Pensa bon

### 5m Cua palabra bo mester yena?

Den cada frase falta un palabra.

- Busca e palabra cu falta.
- Skirbi e palabra corecto den bo buki di tarea.  
Bo por scoge for di:

durante – dilanti di – canto di –  
memey di – tocante

### Obra

1. E obra ta bay ... e hadita cu a perde.
2. E hadita ta bay ... lama.
3. Tur mucha ta cana pia abou ... ensayo.
4. Pa e baile e muchanan mester bay para ... otro.
5. Juffrouw ta para ... sala pa e por wak bon.

banda di - durante - memey di - te - tras di

### Teatro

1. E stoelman ta poni tras di otro y ... otro.
2. Niun hende no por wak e souffleur ... cortina.
3. E actor ta para ... e podium.
4. Sala ta keda keto keto ... e funcion.
5. Tur hende ta keda wak ... final.


### 5n Traha decor

Bo klas ta bay hunga comedia.

Number di e obra ta: Ban circo.

- Pensa un decor pa e obra aki.
- Skirbi den bo buki di tarea kico bo mester.





## 50 Busca plachi cerca frase



- Busca e plachi corecto pa cada frase.
- Traha e tarea den bo buki di tarea.

1. E leon ta morto na soño.
2. E marionetanan ta balia pret.
3. Bo por cumpra carchi na loket.
4. E actornan a bisti un mascarada.
5. E carchi di entrada ta costa dies florin.
6. Nina tin un cashi di popchi.

plachi number ...  
 plachi number ...  
 plachi number ...  
 plachi number ...  
 plachi number ...  
 plachi number ...

## 6 Skirbi bon

### 6k Completa palabra

- Lesa e texto akibou.
- Tin diferente palabra cu falta letter.
- Completa nan y traha e tarea den bo buki di tarea.
- Scoge entre e letternan **iu – io – ia – au – ua**

1. Cindy ta bay wak un comed...
2. Riba e pod...m tin spotlight.
3. E actriz ta un poco nerv...so.
4. E actor pret ta act... bon.
5. Despues di intermedio func...n ta sigui.
6. Na final publico ta duna un fuerte apl...so.

### 6l Nos ta busca ...

Hunto cu bo amiganan y amigonan bo kier prepara un obra.  
Boso mester di disfraz pa e obra.

P'esey bo kier bay pega un papel den supermercado.

- Riba e papel bo ta skirbi exactamente ki sorto di paña y adorno boso grupo mester.
- Traha e tarea aki den bo buki di tarea.




#### Grupo di comedia di mucha ta busca:

shimis largo, sjaal, sombre, .....

.....

**Tel: 5881234**



## 7 Tarea varia

### 7a Pensa bon kico bo ta yena

- Ora mi wekker zona, mi ta *lanta*.
- Ora mi tin hamber, mi ta ...
- Ora mi tin sed, mi ta ...
- Ora mi subi riba un trampolin, mi ta ...
- Ora mi bay un comedia pret, mi ta ...
- Ora mi tin soño, mi ta bay ...



### 7b Skirbi un obra

#### E cacho di mondi


*Scol di bestia ta cerca di caba.  
Prome cu e bestianan bay cas,  
Maestra Cabrito kier papia cu nan.*

- Maestra: Muchanan, awe boso no por bay hunga den mondi. Tin un cacho di mondi ta cana rond. E ta brabo! E tin gana di savoria un di boso.
- Sapo: Pero ami por bula masha halto. E cacho no por gara mi, juffrouw.
- Bina: Y ami por core masha duro.
- Maestra: ...
- Sapo: ...
- Bina: ...



- Skirbi un frase mas pa cada personahe.
- Busca dos mucha mas y presenta bo obra pa e klas.





## 1 Scucha y papia

### Combersacion den kring

Awe bo ta combersa den kring.

- Mayoria di hende gusta nan bisindario.
- Cua ta nomber di bo bario?
- Kico bo ta gusta di bo bario?
- Ta ken ta yuda cuida e barionan di nos isla?
- Kico bo mes por haci pa cuida bo bario miho?

### Regla di combersacion

*Nos ta scucha otro bon.*



## 2 Mi por lesa

### Nanzi y e palo magico

Compa Nanzi tin un hamber teribel.  
Su stoma ta ranca.

Placa pa cumpra algo di smaak  
Nanzi no tin. Masha dia e no por a  
bay e supermercado den bario.  
Henter dia Nanzi ta cana keha.  
Pero Shi Maria no por yud'e.

Ta poco funchi cu calmeki, cu ta  
parce yoghurt, so e por cushina.  
E ta duna Nanzi net loke e mester  
pa keda na bida, pasobra e tin cu  
percura pa su yiunan tambe haya  
algo di come.

Masha tristo Nanzi ta bay sinta pafo  
bou di un palo di calbas.

Ay, mare mi por a cumpra sikiera un  
pan di lechi na e panaderia den nos  
caya, Nanzi ta pensa.

Of un mango na fruteria.

Awa ta basha fo'i su wowo.

Pero diripiente Nanzi ta tende un  
zonido.

E ta bira su cara.

Na otro banda di e palo Nanzi ta  
mira un ser bibo masha straño mes.

E ta zweef y e tin dos hala.

Nanzi ta spanta te bira friu.

“Ken, ken bo ta?”, e ta puntra yen di  
miedo.

“Nunca mi no a mira bo den nos  
bario.”

“Mi ta Flora, e hada di mondi”,  
e ser bibo ta contesta.

“Y ki falta bo, Nanzi?”

Dicon bo ta yora?”

“Ay, mi tin asina hopi hamber”,  
Nanzi ta bisa, “cu mi no por para  
riba mi pia. Masha dia mi no por a  
bay supermercado, ni panaderia, ni  
fruteria.”

Hada Flora ta haya duele di Nanzi.

“Sigui mi”, Hada Flora ta bisa y e ta  
hiba Nanzi na un palo den mondi.

Na e takinan di e palo Nanzi ta mira  
yen di saco di papel colga.

“Esaki si ta un palo straño”,

Nanzi ta bisa.

“Si”, Hada Flora ta contesta.

“Esaki ta un palo magico.

Den cada saco tin cuminda.

Tur dia bo por kita tres saco.

Esey mester ta suficiente pa bo y bo  
yiunan no pasa hamber nunca mas.

Pero un cos si, Nanzi,


si bo kita mas cu tres saco pa dia,

tur saco lo desaparece y

lo bo keda pasa hamber.”

Na e mesun momento Hada Flora ta  
desaparece.

*E cuenta ta continua.*



### 3 Bo a compronde?

- Lesa e cuenta prome.
- Despues contesta e preguntanan.

#### Pregunta

1. Dicon Nanzi no por bay supermercado?
2. Dicon Shi Maria no por duna Nanzi mas cuminda cu loke e ta dun'e?
3. Kico Nanzi ta mira ora e bira su cara?
4. Kico ta un hada?
5. Con yama e hada?
6. Kico Nanzi ta conta e hada?
7. Unda e hada ta hiba Nanzi?
8. Kico tin colga na e palo?
9. Cuanto saco Nanzi mag di kita pa dia?
10. Kico ta pasa si e kita mas saco for di e palo?
11. Pan di lechi ta un sorto di pan cu panaderia ta bende. Ki sorto di pan mas un panaderia ta bende?
12. Kico ta sosode ora bo pasa hamber?
13. Menciona un otro palabra pa *disparce*.
14. Con bo ta kere e cuenta ta sigui?



#### 4 Vocabulario

*Sofia ta conta.*



#### Nos bario

“Mi gusta nos bario.

E ta limpi, berde y dushi.

Bo sa dicon?

Pasobra varios hende ta duna un man.

Mi mami ta traha na oficina.

P’esey tin un mucha muhe ta yud’e  
haci trabou di cas.

E yama Marisa.

Tur mainta e ta bin cu bus.

E bus ta para na parada di bus banda  
di nos cas. Cu su basora, mop y  
ragebol e ta haci e cas bon limpi.

Asina nos cas tambe ta keda limpi y  
bunita manera tur cas den nos bario.

Tur siman mi ta mira e truck di sushi  
core den nos bario.

E recogedonan di sushi ta bay cu  
tur e sushi den e containernan di e  
casnan.

Niun caminda riba caya bo no ta mira  
cup, ni saco di plastic ni bleki.

Tin dia cu e partido di carta riba su  
brommer ta hiba post na varios cas  
den bario.

Y atardi, ora mi tata bin for di trabou,

e ta bay sinta den veranda.

Nos cachonan ta compañ’e.

Nan ta warda, pendiente di

e partido di corant kende tur dia ta  
bin cu su stapel di corant bou brasa.

E hende grandinan ta traha diasabra  
den cura.

Mi tata tambe.

Un biaha pa luna Theo, un hardinero,  
ta bin yud’e.

Nan ta chapí, hala foyo, corta mata  
cu sker di corta mata y tin biaha  
planta mata tambe.


Bon, bo ta compronde awor  
dicon nos bario ta asina dushi  
y bunita?

Ta p’esey mes mi gust’e.”



#### Tarea 1


- Cua palabra falta den e frasenan?
- Lesa e frase bou di cada plachi.
- Busca e palabra(nan) cu falta den e rij di palabra akibou.
- Skirbi e palabra(nan) den bo buki di tarea.



1  
E ... ta para na e ...



2  
E recogedo di sushi ta pone e ... patras riba e rand di e ...



3  
E partido di carta ta parti tur carta cu su ...



4  
E mucha muhe cu ta haci cas limpi tin un basora, un ... y un ...



5  
E partido di corant tin un ...



6  
E hardinero ta corta e matanan cu su ...

### Tarea 2

Bo sa e contesta?

- Unda e truck di sushi ta bay cu tur saco di sushi?
- Kico nan ta haci eyman cu e sushi?

### Tarea 3

Un partido di carta ta parti carta.

Kico mas e ta parti?

- Skirbi esaki den bo buki di tarea. Kico un hardinero mester pa haci su trabou bon?
- Skirbi esaki den bo buki di tarea.

## 5 Pensa bon

### 5a Bo tambe por?

- Bo tambe por cambia e frasenan akibou manera e ehempel?

Ehempel:

*Marisa tin un gamus.*

*Esey ta su gamus.*

*E gamus ta di dje.*

- *Sigui na e mesun manera.*
  1. Nos tin un bunita bario.
  2. Bo tin un stapel di corant.
  3. Nos tin un container di sushi.
  4. Mi tin un carchi di bus.
  5. Boso tin un ragebol.
  6. Theo tin un sker di corta mata.
  7. Nan tin un auto di trabou.




### 5b Caba e frase

- Mira e ehempel  
*Un panadero ta traha pan.*

1. Un hardinero ta ...
2. Un partido di carta ta ...
3. Un recogedo di sushi ta ...
4. Un partido di corant ta ...
5. Un chauffeur di bus ta ...
6. Un dokter ta ...
7. Un sacado di potret ta ...
8. Un polis ta ...
9. Un verfdo ta ...
10. Un bombero ta ...





### 5c Busca palabra cu nificacion contrario

- Lesa e frase bon.
- Scoge y yena un palabra cu tin un nificacion contrario di e palabra *cursiva* den e frase.
- Skirbi e palabranan cu nificacion contrario den bo buki di tarea.
- Bo por scoge for di:

baha – berde – planta – saca – for di – sushi – tapa

1. E hardinero ta *coba* buraco.
2. Bo tambe ta haci cura *limpi*?
3. E truck di sushi ta *hisa* e container berde.
4. E hardinero ta *ranca* mata seco.
5. E partido di carta ta *hinca* carta den brievebus.



### 5d Traha bon frase

- Bo tin cu traha bon frase cu e palabranan akibou.
- Cuminsa cu e palabra cu ta skirbi cu mayusculo.


1. ta yuda – Marisa – mama
2. e muraya – a pleister – E metsla
3. den saco di sushi – Ruben – a yena – blachi di mata
4. ta pasa – den nos caya – E truck di sushi
5. un mucha di nos barío – ta – E partido di corant
6. ta para – E chauffeur di bus – na parada di bus
7. a planta – Ayera – un mata di cayena – mi tata – den cura



















### 6 Skirbi bon

#### 6a Cambia un letter so

- Wak e plachinan bon.
- Bo mester cambia un letter cada bes den e palabra.
- Skirbi e palabranan nobo den bo buki di tarea.
- Hala un strepi bou di e letter cu a cambia.




	set →		...et →		ne...
	toca →		...oca →		b...ca
	bolo →		bol... →		...ola
	pinda →		pin...a →		...inta
	balchi →		ba...chi →		...anchi



## 6b Bo por caba e cuenta?

- Wak e plachi bon.
- Lesa e texto cortico.
- Falta algun palabra. Bo por scoge for di e palabranan bou di e texto.
- Skirbi e frasenan den bo buki di tarea.
- Skirbi nechi y sin fout.



## Wantomba

Den cunucu tin un popchi ...  
 E ta pega riba un ...  
 Su dos pianan ta ... bay bin den biento.  
 E popchi tin un ... cu manga largo.  
 Riba su cabes e tin un ...  
 Bo sa con ... e popchi aki?  
 Wel, e ta un wantomba cu ta ... parha.  
 E ta ... cu tur parha cu tin gana di come ...  
 cu Shon Cunukero a caba di ...  
 Un wantomba ta cuida e ... bon.



bachí – core – cose – cunucu – palo – sembra – simia – sombre –  
 sopi – spanta – straño – strea – yama – yena – zwaai – zweef


## 1 Scucha y papia

### Haci respondi

“Carina”, Mama ta bisa,  
“Tanchi Elma a caba di yama.  
E ta bin di bishita awe merdia.  
Mi ta bay traha un dushi bolo.  
Mi tin tur cos den cas, ta webo so mi falta.  
Bo ta mucha grandi caba, n’ ta berdad?  
Bo por bay cumpra un caha di webo  
na e minimarket na skina di caya?”

“Si, Mama”, Carina ta bisa.  
Djey Mama ta dun’e un cartera chikito  
cu placa.  
Carina ta bisti su sapato y e ta sali fo’i cas mesora.  
Pero kico ta pasa na caminda?





- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.

## 2 Mi por lesa

*Continuacion di e cuenta*

### Nanzi y e palo magico

Mesora Nanzi ta subi den e palo.  
Den un frega di wowo e ta kita tres saco.

Den e prome saco tin un desayuno masha dushi.

Den e di dos saco tin e cuminda di merdia.

Y den saco number tres tin e cena: cuminda di anochi.

Nanzi ta core bay cas cu e saconan.

E ta pone nan riba mesa cu masha buya.

Pero prome cu Nanzi por a conta kico a pas'e, Shi Maria y su yiunan ta habri e saconan y nan ta come tur cos.

Nanzi ta keda cu un tayo blo bashi.

E cos aki no ta pasa mi mas,

Nanzi ta pensa.

E siguiente dia e ta bay na e palo magico atrobe y bou di e palo mes Nanzi ta come tur e tres cumindanan. E atardi ey e ta conta Shi Maria cu e palo magico a duna cuminda un biaha so.

“Dicon bo no ta come bo funchi cu calmeki anto?”, Shi Maria ta puntr'e un tiki straña.

“Ma ta con bin bo n' tin hamber?”

“Awe mi tin un tiki dolor di barica”, Nanzi ta gañ'e.

Pero ora cu e siguiente dia y e dia despues tampoco Nanzi no kier come, Shi Maria no ta confia e cos mas.

Su manece e ta sigui Nanzi den scondi, ora cu Nanzi cana bay na e palo magico.

Tras di poco mata shimaron Shi Maria ta para wak con Nanzi ta kita tres saco for di e palo y ta come tur e cumindanan.

Su siguiente dia Shi Maria y tur su yiunan ta bay na e palo magico, prome cu Nanzi lanta for di soño.

E yiunan ta subi den e palo y nan ta ranca tres saco di cuminda.

Pero Shi Maria kier mas.

Net na momento cu Pegasaya, e yiu mas chikito, ta ranca e di cuater saco, tur e saconan ta disparce.

Ora Nanzi yega na e palo magico mas laat den dia, e ta compronde mesora ta kico a pasa.

E ta cay sinta bou di e palo y e ta cuminsa yora cu masha duele.

Pero maske con duro e yora, Hada Flora no ta aparece mas.

Y asina ta cu te dia di awe Nanzi mes mester busca su cuminda mescos cu tur otro haraña den bario y na mundo.



### 3 Bo a compronde?

- Lesa e cuenta prome.
- Despues contesta e preguntanan.

#### Pregunta

1. Kico tin den e saconan cu Nanzi ta kita for di e palo magico?
2. Kico Nanzi ta haci cu e saconan e prome biaha?
3. Kico Shi Maria y su yiunan ta haci ora Nanzi a pone e saconan riba mesa?
4. Kico Nanzi ta haci su siguiente dia cu e saconan ora cu e bay na e palo magico?
5. Dicon Shi Maria ta haya straño cu Nanzi no kier come?
6. Kico Nanzi a gañ'e?
7. Kico Shi Maria ta haci e siguiente dia?
8. Dicon tur saco ta disparce?
9. Kico asina bo ta come pa desayuno?
10. Con bo ta haya e cuenta cu Nanzi ta come sin hiba cuminda pa su yiunan?
11. Cua les Nanzi por a siña di loke a pasa?



## 4 Vocabulario

### E bario di Tanchi Bea

Tanchi Bea a bin pasa vakantie na Aruba.

Tanchi Bea ta biba na Hulanda.

Awe Carly cu Mama ta bay keiro cu Tanchi Bea. Carly ta sobrino di Tanchi Bea.

Nan ta drenta e bario, caminda Tanchi Bea tabata biba hopi aña pasa.

“Oh, cos a cambia!”, Tanchi Bea ta bisa asombra.

“Wak, e pomp di gasolin ey no tabat’ey y wak ... un fruteria tambe!”

“Asina mes, Tanchi Bea”, Carly ta bisa.

“Y banda di e pomp tin un luga di drecha taira awor. Ora mi bais tin flat taira, mi ta bay eynan.”

“Si, hopi cos a cambia, Bea”, Mama ta agrega.



“Wak, na skina di caya tin un panaderia nobo cu ta bende e pan di lechi mas dushi di nos isla. Warda ora bo mira e restaurant grandi di Chines cu nan a traha banda di e carniceria.”

Tanchi Bea ta wak for di bentana di auto.

“Oh, oh, casi mi no ta reconoce mi bario mas!”, e ta bisa cu asombro.

“Wel, Bea”, Mama ta bisa cu un sonrisa, “percura pa e biaha aki bo no bay largo asina!”

“Sigur cu no”, Tanchi Bea ta bisa.

“Laga nos ban savoria un dushi pastechi na e snack.”



Tanchi Bea ta cumpra pan na un ...




Awe Mami ta cushina carni stoba. El a cumpra carni na un ...

• carniceria

• fruteria

• panaderia



3 Fruta y berdura ta saludabel.  
Esey bo ta haya na un ...



4 Awe mi tin gana di come un  
pastechi. Mi ta bay cumpr'e na  
un ...



5 Pa manteca bo por bay na un ...



Awe nos no ta come na cas,  
sino na un ...

### Tarea 1

Kico bo ta mira?

- Lesa e frase bou di cada plachi.
- Bo por scoje for di e palabranan den e rij di palabra akibou.
- Skirbi e palabranan den bo buki di tarea.

### Tarea 2


Den un fruteria bo no por cumpra fruta so, sino berdura tambe.

- Cua sorto di fruta y berdura bo conoce?
- Tin dos kolom den bo buki di tarea.

Skirbi den un kolom tur fruta cu bo conoce y den e otro kolom tur berdura.

### Tarea 3

- Kico asina nan ta bende na un snack?
- Skirbi e palabranan den bo buki di tarea.




• restaurant

• snack

• supermercado





### 5g Traha pregunta y duna contesta

- Lesa e ehempel.
  - Purba traha e otro frasenan na e mesun manera.
1. Den nos bario tin un panaderia.  
*Pakico tin un panaderia den nos bario?*  
*Pasobra hopi hende kier cumpra pan.*
    - Bo mes por awor?
  2. Den nos bario tin un pomp di gasolin.  
*Pakico ...?*  
*Pasobra ...*
  3. Den nos bario tin un consultorio di dokter.  
*Pakico ...?*  
*Pasobra ...*
  4. Den nos bario tin un centro deportivo.  
*Pakico ...?*  
*Pasobra ...*
  5. Den nos bario tin un scol.  
*Pakico ...?*  
*Pasobra ...*



### 5h Bo ta corda?

"Awe ta diadomingo", Ana ta bisa.  
 "Mañan mi tin cu bay scol."

- Bo ta corda number di e dianan di siman?
- Menciona nan awor.



**6 Skirbi bon**

**6c Kico Beer ta haci?**

- Wak e plachinan bon.
- Skirbi den bo buki di tarea kico Beer ta haci.
- Skirbi nechi y sin fout.



1. Beer ta ...



2. Beer ta ...



3. Beer ta ...



4. Beer ta ...



5. Beer ta ...



6. Beer ta ...




7. Beer ta ...



8. Beer ta ...



9. Beer ta ...



### 6d Traha tres kolom di palabra

E letter **e** tin tres diferente zonido:

- **e** den bleki, **e** den sker y **e** den sanger.
- Akibou tin un rij di palabra cu **e**.
- Wak den cua kolom cada palabra ta pas.
- Traha e tarea aki den bo buki di tarea.



berdura – boter – caramel – cartera – dede – dokter – feroz – homber – hotel – insecto – mangel – toteki

e di bleki	e di sker	e di sanger



### 6e Skirbi plural


- Skirbi e siguiente palabranan den nan forma plural.
- Traha e tarea den bo buki di tarea.

- |              |          |
|--------------|----------|
| 1. e man     | e mannan |
| 2. e bario   | e .....  |
| 3. e scol    | e .....  |
| 4. e Indjan  | e .....  |
| 5. e carson  | e .....  |
| 6. e oficina | e .....  |
| 7. e tienda  | e .....  |
| 8. e mashin  | e .....  |



Tur su carson... ta blauw.  
 Diadomingo e tienda... den caya ta cera.  
 Den e bario... di Santa Cruz y Paradera falta luz.





## 1 Scucha y papia

### Combersacion den kring

- Awe bo ta combersa den kring.
- Bo ta papia di un bishita na dokter.
- Tin un dokter den boso bario of boso tin cu bay mas leu?
- Ki ora bo ta bay dokter?
- Kico asina bo ta sinti ora bo ta malo?
- Kico dokter ta haci ora bo ta den su oficina?
- Tin biaha dokter ta skirbi un recept. Cu e recept ey bo ta haya remedi. Na unda bo tin cu bay cu e recept?

### Regla di combersacion

*Niun di nos no ta keda mucho largo na palabra, pasobra tur hende tin gana di bisa algo.*



## 2 Mi por lesa

### Bishita di dokter

“Yuda mi!

Ken por yuda mi?”

Reno ta wak rond, pero e no ta mira ta di unda e grito ta bin.

“Dushi, bin yuda Machi Nela. Bin!”

Reno ta habri porta di cura di bisiña.

E ta mira Machi Nela riba suela.

Ta kico a pas’e?

Machi Nela su cara ta tur soda.

Cu un man Machi Nela ta frega su rudia robes.

Su rudia ta tur hincha.

“M’a tropica riba e slang”, Machi Nela ta conta Reno.

“Awor mi no por lanta mas.

Mi yiu, bo por bay coy mi tas preto den camber?

Den dje tin un carchi cu number di telefon di oficina di dokter.”

“Mesora, Machi”, Reno ta contesta.

“Mi mes ta yama dokter pa Machi.”

E dokter di cas ta yega un rato despues.

E kier pone Machi Nela riba cama pa e samina e rudia.

Pero Machi Nela ta un poco pisa.

“Mi mester di un hende cu brasa

fuerte pa yuda mi lanta Machi Nela for di suela”, e dokter ta bisa.

“Mi ta bay yama nos bisiña, Lino boxdo”, Reno ta bisa.

“E por hisa Machi sigur.”

Un rato despues porta di cura ta bolbe habri. Lino boxdo ta bin na careda.

E ta hisa Machi Nela manera cu ta un pluma e ta. Cu cuidou e ta pone Machi Nela riba su cama.

Machi Nela ta hala un rosea grandi.


“Dokter, Machi Nela tin cu bay hospital?”, Reno ta puntra preocupa.

“No, mi yiu”, Dokter ta responde.

“Aki un par di dia Machi Nela ta bon bon atrobe.

Ta remedi pa dolor so e mester bebe tres biaha pa dia.

Bo por bay botica p’e?”





### 3 Bo a compronde?

- Lesa e cuenta prome.
- Despues contesta e preguntanan.



### Pregunta

1. Dicon Reno no ta mira Machi Nela?
2. Unda Machi Nela a cay?
3. Con e rudia ta awor?
4. Dicon Machi Nela a cay?
5. Kico tin den Machi Nela su tas?
6. Dicon e dokter no por a hisa Machi Nela?
7. Ken si por a hisa Machi Nela for di suela?
8. Dicon Machi Nela ta hala un rosea grandi?
9. Cuanto biaha pa dia Machi Nela mester bebe su remedi pa dolor?
10. Cua ta e favor cu e dokter ta pidi Reno?
11. Machi Nela a haya remedi pa bebe. Ki sorto di remedi abo por menciona?
12. Con yama e botica mas cerca den bo bario?
13. Con bo ta haya cu Reno a actua?

## 4 Vocabulario

### Dokter di cas

Dialuna mainta hopi hende ta bay nan dokter di cas.

E sala di espera semper ta yen.

Hende ta tosa y ta nister.

Nan tin dolor di cabes y dolor di barica.

Tur hende kier haya un chens pa pasa cerca dokter lihe. Tambe bo por haci un cita. E assistent di dokter ta duna bo un dia y ora pa bo bin. Den su consultorio dokter ta tene consulta.

Dokter ta samina horea y ta scucha pulmon.

E ta pasa hangua y ta pone pia of man den verband.

Tin biaha e ta skirbi un recept.

Den casi tur bario tin un of mas dokter di cas.

Bo no mester core bay Eerste Hulp pa tur cos.

Bo ta bay Eerste Hulp, ora bo haya un accidente of ora bo sinti hopi malo y bo no por warda te su siguiente dia.

Ta bon cu tin dokter di cas den bario. Dokter t'ey pa yuda nos y pa duna nos bon conseho.



Ora bo ta malo, bo ta bay ...



Bo ta warda bo den ...



Dokter ta ...



Dokter ta ...




Dokter ta ...



Dokter ta ...

• assistent • botica • consultorio di dokter • mara pia den verband • pasa




o turno



E ... ta yuda dokter.



Dokter ta ...



Cu e recept bo ta bay ...

**Tarea 1**

- Wak e plachinan bon.
- Lesa e frase bou di cada plachi.
- Busca e palabra(nan) cu falta den e rij di palabra akibou.
- Skirbi e palabranan den bo buki di tarea.

**Tarea 2**

- Kico bo ta mira den un sala di espera di dokter?
- Kico bo ta mira den consultorio di dokter mes?
- Kico bo por cumpra na un botica?

E contestanan di e tarea aki bo ta skirbi den bo buki di tarea.



## 5 Pensa bon

### 5i Cua palabra bo por uza?

- Den cada frase tin palabra *curativa*.
- Busca e palabra cu ta nifica casi mescos.
- Bo por scoje for di:

camber – hisa – pusha – skirbi

1. Milo ta *habri* e porta di oficina di dokter.
2. E assistent ta *lanta* su cara wak ta ken.
3. E ta *nota* number di Milo pa dokter.
4. Despues e ta hiba Milo den *consultorio* di dokter.

bira – purba – samina – ta puntra


5. Milo ta bisa cu su stoma ta *wal*.
6. Dokter ta *controla* Milo.
7. “*Trata di come hopi berdura*”, Dokter ta bisa.
8. “*Ijscream si mi mag come?*”, Milo *kier sa*.

### 5j Coregi frase

- Ata! Lesa e frasenan akibou bon. Tin algo straño den e nificacion di e frasenan aki.
- Kico segun bo ta fout?


1. Si bo tin keintura, bo mester hunga pafo.
2. Bo ta uza un thermometer pa corta huña.
3. Cu un recept di dokter bo ta bay banco.
4. Si bo kibra bo man, bo tin cu bay den un rolstoel.
5. Den un botica bo por cumpra jeans.
6. Un ambulance ta hiba bo Playa.
7. Si bo tin dolor di horea, bo ta bay polis.





### 5k Kico tin den e tas di un dokter di cas?

- Tin biaha dokter ta bin bo cas ora bo ta hopi malo.
- Kico asina un dokter tin den su tas?
- Wak e plachinan bon y skirbi solamente e cosnan cu un dokter por tin den su tas. Skirbi nan den bo buki di tarea.



pleister



catuna



popcorn



chuculati



sker



thermometer



enguento



stetoscop



pañã di mesa



hangua



verband



pincet



pildo



yodi



recept

### 6 Skirbi bon

#### 6f Lesa y skirbi


- Lesa e frasenan akibou bon.
- Skirbi e palabranan cu ta na color, nechi y sin fout den bo buki di tarea.

1. Maya su mama ta **dokter di popchi**.
2. Popchi y **peluche** por bay cerca dje.
3. Maya su mama no ta **pasa hangua**.
4. Ni e no ta **scucha pulmon** tampoco.
5. E ta **drecha** popchi kibra.
6. Tin bes e ta duna nan un **nanishi** nobo.
7. Of e ta cose un **brasa** kibra.
8. Tur popchi ta sali **contento**.
9. Maya su mama ta un bon **dokter**.

#### 6g Dictado di frase

- Awor bo ta bay scucha un dictado.
- Bo maestra/o ta ripiti e palabranan cu abo tin cu skirbi.





### 6h Skirbi recept

- Awe bo ta hunga dokter.  
Bo amiga ta bin cerca bo.  
Su popchi ta malo.
- Bo ta skirbi un recept.  
Kico asina e popchi tin mester di dje pa  
e bira bon?
- Traha e tarea den bo buki di tarea.



### Recept

Number di popchi:

.....

Adres di popchi:

.....

E popchi tin cu:

.....

.....

.....

.....

Number di dokter di popchi: .....

## 1 Scucha y papia

### E palo di baobab

Leu for di nos bario y leu for di nos isla,  
te na Africa aya tin un palo di mata masha  
special.


E palo tin forma di un boter.


Su troncon ta duro y smal y e takinan mas  
ariba casi no tin blachi.

Ta manera e palo a bay para boca abou  
cu su reisan den laira.


Scucha e cuenta!

Pa bo haya sa dicon e palo tin un forma straño  
asina.





- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.



### 2 Mi por lesa

#### Na warda di polis

“Boso ta ban cu mi?”, Papi ta puntra Kimmy cu Rudy.

“Mi tin cu bay haci algun respondi y despues mi tin un sorpresa pa boso.”

“Ye!”, Kimmy cu Rudy ta grita pareu y mesora nan ta bula den auto.

Prome Papi ta core bay panaderia.

Despues nan ta bay un libreria.

Kimmy ta haya un buki di chasco y Rudy ta haya un buki di aventura.

“Unda nos ta bay awor, Papi?”,

Kimmy ta puntra ora nan ta den auto atrobe.

“Nos ta bay warda di polis den nos bario”, Papi ta contesta.

Spanta Kimmy cu Rudy ta wak otro. Ta kico nan ta bay haci na warda di polis?

“Sigur Papi sa cu nos a coy mangel den cashi sin pidi”, Kimmy ta bisa pocopoco den Rudy su horea.

“Pero Papi y Mami tabata drumi”, Rudy ta contesta.

“Nos no por a lanta nan. Bo ta kere nos mester bay prizon?”

“Mi no sa”, Kimmy ta contesta y su lip ta cuminsa tembla. “Ya, nos a yega caba”, Papi ta bisa, mientras e ta para e auto bou di un palo halto na warda di polis.

Pocopoco Kimmy cu Rudy ta baha for di auto.

Cabes abou nan ta cana bay paden.

“Muchanan, bay sinta un rato riba e banki ey”, Papi ta bisa.

“Mi ta bin bek un djis.”

Kimmy ta bay sinta banda di Rudy.

Nan ta tene man di otro.

Spanta nan ta wak rond.

Na e murayanan nan ta mira poster cu potret di algun bandido.

Un polis ta drenta warda.

Den su man e tin un klop.

E boeinan na su faha ta move bay bin, mientras e ta cana.

Kimmy ta tene Rudy su man mas duro ainda.

Diripiente un porta ta habri y Papi ta sali cu un otro polis.

“Ya, muchanan”, Papi ta bisa.

“Nos ta asina leu. Boso ta ban?”

“No”, Kimmy ta yora.

“Mi no kier bay prizon.”

“Ami tampoco”, Rudy tambe ta snik.

“Bay prizon?”, Papi y e polis ta bisa straña.

“Ta ken di cu boso mester bay prizon?”

Mucha chikito no sa bay prizon y ademas boso ta bon mucha.





Ta un sorpresa nos tin pa boso.  
Hunto nos ta bay dal un ronchi den  
bario den auto di polis.  
T'esey boso tabata kier semper,  
toch?"

Cu wowo grandi Kimmy y Rudy ta  
wak otro.  
Nan ta core seca nan lagrimanan.  
Pocopoco un sonrisa ta bin riba nan  
cara.  
"Ye!", nan ta grita pareu, "nos ta  
bay keiro den auto di polis."  
"Shon Polis ta cende e sirena  
tambe?", Rudy ta puntra.  
"Podise", e polis ta bisa na  
harimento.  
Kimmy cu Rudy no ta perde pa  
gana y mesora nan ta core bay pafó  
tras di Papi y Shon Polis.



### 3 Bo a compronde?

- Lesa e cuenta prome.
- Despues contesta e preguntanan

### Pregunta

1. Kico Papi ta puntra Kimmy cu Rudy?
2. Unda nan ta bay prome?
3. Ki regalo e muchanan ta haya di Papi?
4. Dicon e muchanan no a pidi Mami cu Papi mangel?
5. Kico nan ta wak na muraya den warda di polis?
6. Dicon Kimmy cu Rudy tin miedo di bay cu Papi y e polis?
7. Ta kico e sorpresa ta?
8. Kico Rudy kier pa e polis haci?
9. Kimmy cu Rudy a gusta e sorpresa.  
Na kico bo por ripara esey?
10. Na ki momento polis sa cende e sirena di e auto di polis?
11. Abo a yega di sinta den auto di polis?



#### 4 Vocabulario

##### **Dia di planta mata**

Maika ta contento.

Porfin e dia a yega.

Awe tin e evento di planta mata.

Maika ta lanta for di trempan.

E no kier yega laat.

Hunto cu Papi, Mami y Bobby, su cacho, e ta bay scol.

Ey lo start un caminata.

Nan lo cana bay na e plenchi memey den e parke nobo di bario.

Banda di e plenchi tur mucha lo bay planta un mata.

Exactamente och'or e caminata ta cuminsa.

Maika cu Bobby ta cana dilanti.

Un brassband ta sigui nan tras.

Ora pa ora ta bin mas hende acerca.

Un panadero, un hardinero, un dokter di cas, un bendedo di buki y hasta dos futbolista famoso, tur t'ey.

Nan tur ta cana hunto cu nan famia den e caminata.

Nan ta cana drenta un caya, sali for di e otro caya te ora nan yega na e plenchi den e parke di bario.



E luga ta nechi dorna.

Tur caminda tin bandera.

Banda di e plenchi Maika ta mira un vijver cu un fontein.

Maika ta e prome pa planta su mata.

E ta hacie cu hopi smaak.

Despues e otro muchanan tambe ta planta di nan.

E buraconan ta coba caba.

“Esta bunita nos parke ta bira”,

Maika ta pensa ora tur mata ta planta.

Aki nos por bin tur diadomingo pa picnic.

Aki nos lo pasa bon.

##### **Tarea 1**

- Kico bo ta mira?
- Lesa e frase bou di cada plachi.
- Busca e palabra cu falta den e rij di palabra akibou.
- Skirbi e palabranan den bo buki di tarea.

##### **Tarea 2**

Skirbi den bo buki di tarea kico asina un hardinero tin cu haci den un parke.





• caminata


• fontein

• parke


• picnic



Nos ta tene un ...



Den nos bario tin un ...



Den e parke tin un ...



Den e parke tin un ... y un ...



Palo halto ta duna ...



Riba yerba nos ta ...

### Tarea 3

Bo sa e contesta?

Scoge e palabra corecto for di e kolom di palabra banda di e frase.

- |                          |                |
|--------------------------|----------------|
| - Un mata ta crece y ... | floria - dorna |
| - Un taki ta ...         | sinta - dobla  |
| - Un blachi ta ...       | cana - cay     |
| - Un flor ta ...         | habri - planta |

• plenchi

• sombra

• vijver

## 5 Pensa bon

### 5l Hincá palabra den frase

- E palabra *cursiva* a sali for di e frase.
- Hincá e palabra den e frase bek.
- Skirbi e frase corecto den bo buki di tarea.



### Den parke

1. Nos ta cana bay na e nobo den bario.
2. E no ta mucho largo.
3. Den parke tin un grandi.
4. Memey di e plenchi tin un vijver cu un.
5. Nos ta bay sinta bou di un halto.
6. Tin dushi bou di e palo.
7. Nos ta habri un riba suela.
8. Awor nos ta haci un dushi.
9. Nos ta come y bebe juice.
10. Den parke di nos nos ta pasa bon.

*parke  
caminata  
plenchi  
fontein  
palo  
sombra  
pañá  
picnik  
salada  
bario*

### 5m Yena e palabra corecto

Den cada frase falta un palabra.


- Busca e palabra cu falta.
- Skirbi e frasenan den bo buki di tarea.  
Bo por scoge for di:

berde – bieu – importante – limpi – nobo

### Accion den bario

1. Centro di bario a organisa un actividad ...
2. Mester stop kapmento di palo di mata ...
3. Awe ta dia di planta mata ... acerca.
4. Ora tin hopi mata, e bario ta ... atrobe.
5. Nos tur kier nos bario ... y bunita.





### 5n Frase cu *no*

- Cambia e frasenan.
- Uza e palabra *no*.
- Wak e ehempel.

Renny a duna mi un mangel.  
Renny *no* a duna mi un mangel.

1. Setty gusta tur actividad di e centro di bario.
2. Carina ta bay les di computer.
3. Tin les tur merdia despues di scol.
4. Dilanti di e centro di bario tin un plenchi.
5. Luty gusta hunga futbol riba e plenchi.



### 5o Kico bo ta uza?

chapi – halado – machete – pik – shobel

Bo ta kap rama cu un ...  
Bo ta kita yerba shimaron cu un ...  
Bo ta montona blachi cu un ...  
Bo ta coba buraco cu un ...  
Bo ta saca tera cu un ...



### 5p Cua palabra ta pas?

- Cua di e palabranan akibou tin algo di haber cu e palabra parke?
- Skirbi nan den bo buki di tarea.



azeta – banki – barbero – cine – dori – fontein – hardinero – keiro – landa – mata – palo – parha – pato – picnic – plenchi – serbete – toro – vijver – yerba

## 6 Skirbi bon

### 6i Wak bon y skirbi

Skirbi palabra cu –cion y –sion.

- Lesa e frase y scoge e palabra corecto.
- Skirbi e frase den bo buki di tarea.

1. Mayra a traha un ... pa Dia di Mama.
2. Den e sala di fiesta tin un bunita ...
3. Mi tin hopi ... pa mi wela.
4. E ... di mayor ta organisa un feria na scol.
5. Mañan nos klas tin un ... pa museo.
6. Na ... nan sa pasa bon pelicula di mucha.
7. Ayera FAVI y FEPO a ricibi ... di nos scol.
8. Bo conoce e ... papia manera lora?



cansion-cansion  
decorasion-decoracion  
stimacion-stimasion  
comicion-comision  
excursion-excurcion  
televiscion-television  
donacion-donasion  
expresion-exprescion

### 6j Skirbi mas palabra


- Lesa e palabranan den e kolomnan akibou.
- Skirbi den cada kolom tres palabra acerca.
- Traha e tarea den bo buki di tarea.

ai	ay	ei	ey
bais	gay	beis	rey

### 6k Ban haci propaganda

- Ban haci propaganda pa bo bario.
- Conta bo klas algo di bo bario.
  - Skirbi den cua bario bo ta biba.
  - Kico tin di mira y di haci den bo bario?
  - Ken ta cuida bo bario?
  - Kico bo gusta mas di bo bario?
- Traha e tarea den bo buki di tarea y pinta algo bunita di bo bario.





## 7 Tarea varia



### 7a Yena number

- Wak e plachi bon.
- Skirbi na cada number e palabra corecto.
- Scoje for di e palabranan cu tin skirbi akibou.
- Traha e tarea den bo buki di tarea.



blachi – conopi – flor – nervio – reis – taki – top – troncon

- 1 = .....
- 2 = .....
- 3 = .....
- 4 = .....
- 5 = .....
- 6 = .....
- 7 = .....
- 8 = .....




### 7b Charada

Mi ta cana, pero mi no tin pia.  
 Mi ta cana sin stop.  
 Bo por colga mi na muraya.  
 Ra ra, ta kico mi ta?

Binti mucha ta para  
 bou di un parasol.  
 Toch solo no ta kima niun.  
 Ra ra, con por ta?





## 1 Scucha y papia

### Combersacion den kring

- Awe bo ta combersa den kring.
- Bo ta papia tocante awa.
- Nos ta bebe awa tur dia. Sin awa nos no por biba. Con awa ta yega nos cas?
- Na unda nan ta produci awa na Aruba?
- Nos compania di awa ta saca awa dushi for di awa salo di lama. Ken por conta algo di esey?
- Antes tabata otro. E hendenan no tabatin cranchi di awa na cas. Di unda hende tabata haya awa antes?
- Con nan tabata warda awa?

### Regla di combersacion

*Nos ta scucha otro bon.*

### 2 Mi por lesa

#### E barbulet y Prinses Maritza

Hopi aña pasa tabatin un barbulet cu tabata haya awa cu sucu cerca un prinses. Prinses Maritza tabata pone un comchi chikito di oro den cura di e palacio. Contento e barbulet tabata bin bebe awa tur dia for di e comchi. Pero un dia Prinses Maritza tabatin mal beis, pasobra e barbulet no kier a drenta den palacio pa hunga cu ne. “Keda pafo numa”, e prinses a bisa rabia y na e mesun momento el a tira e comchi di oro abou.

Tur spanta e barbulet a bula bay. Nada no a pas’e, pero e comchi si a machica.

E barbulet a bay sinta riba un rosa den cura.

Tristo e tabata wak rond. Awor mi mester bay bebe awa cerca e flornan atrobe, el a pensa. Casi sigur lo mi no haya awa cu sucu nunca mas.


Pero pa su sorpresa e siguiente mainta Prinses Maritza a bolbe pone e comchi di oro cu awa cu sucu den cura.

Kico lo mi haci?, e barbulet a pensa. Corda cu e prinses tin mal beis ainda, anto e tira e comchi chikito riba mi! No, e barbulet a pensa, mi

no ta bay bebe awe. Mi ta warda trankil wak kico lo bay pasa. Ora Prinses Maritza a mira e barbulet bula bay, el a bira masha tristo. Pero el a laga e comchi di oro keda na su luga den cura. E tabata spera cu un dia e barbulet lo cambia di idea.

Tur dia e barbulet tabata bin bek si, pero toch e no tabata tripi bebe di e awa. Tur dia e tabata mira con e awa tabata bira menos pa motibo cu e comchi tabata den solo. Te cu un bon dia no tabatin niun gota di awa mas aden. E awa a evapora. Ta sucu so a keda den e comchi. Pocopoco e barbulet a bula yega acerca. El a bay sinta riba rand di e comchi. E pipitanan di sucu tabata briya den solo manera poco diamanta chikito.

E barbulet a haya esaki asina bunita cu el a cuminsa balia di alegria. Prinses Maritza, cu a mira e barbulet balia, a kere cu e pober bestia a bira loco di sed. Mesora el a yena un canica di cristal cu awa pa yena e comchi di oro. Ora e barbulet a mira e prinses bin, el a bula bay sinta riba un flor. Cu masha cuidou Prinses Maritza a basha awa den e comchi y mesora e pipitanan di sucu a disparce den e awa.



Un rato despues Prinses Maritza a mira con e barbulet a bula pocopoco yega acerca pa bebe di e awa dushi. Cu un sonrisa el a sinta gosa di e espectáculo bunita aki. For di e momento ey e barbulet a keda bin bek tur dia y Prinses Maritza a bira su miho amiga.



### 3 Bo a compronde?

- Lesa e cuenta prome.
- Despues contesta e preguntanan.

### Pregunta

1. Kico e prinses tabata pone pafo tur dia?
2. Pa ken e awa tabata?
3. Kico e prinses a haci dia e tabatin mal beis?
4. Dicon e tabatin mal beis?
5. Kico e barbulet a mira pa su sorpresa e siguiente mainta?
6. Dicon e barbulet no tabata tribi bay bebe awa for di e comchi?
7. Kico a pasa cu e awa den e comchi?
8. Cu kico a compara e pipitanan di sucu?
9. Dicon e barbulet tabata balia di alegria?
10. Kico e prinses a kere ora el a mira e barbulet balia?
11. Kico el a haci mesora?
12. Bo por pensa un otro palabra pa *espectaculo*?
13. Rabiamento a causa cu e barbulet a haya miedo di e prinses. Bo ta kere cu esaki ta bon of malo?
14. Con a sigui cu Prinses Maritza y e barbulet?

## 4 Vocabulario

### Mi tin gana di sa ...

Adri: Papi, semper hende por a bebe awa for di cranchi?

Papi: No, Adri, antes tabata otro. Ben, mi welo mes tabata bende awa.

Prome cu un garoshi. Un burico tabata hala e garoshi.

Riba e garoshi tabatin un bari cu awa. Despues mi welo tabata bende awa cu su truck. E tabata pasa cas pa cas.

Adri: Unda Papa Ben tabata haya awa pa e bende?

Papi: E tabata saca awa for di pos of e tabata chica awa for di rembak.

Adri: Con e rembak tabata yena cu awa?

Papi: Ora awa yobe, e awa ta pasa den het di e dak, basha den rembak.

Adri: Pero unda e hendenan cu cumpra awa tabata warda nan awa di bebe? No tabatin frishider toch?

Papi: Nan tabata warda nan awa di bebe den tinashi of den purun.

Adri: E, e, Papi, awendia si ta otro.

Habri cranchi y awa ta basha di biaha.

Papi: Si, mi yiu. Nos compania di awa ta saca awa salo fo'i lama. Nan ta saca e salo y nan ta yena e awa den tanki di awa. Djey e awa ta pasa den tubo grandi. Via e tubo di awa den nos cura e awa ta yega na nos cranchi.

Adri: Facil, no? Pero mi ta haci manera Papi a siña mi. Mi no ta drispidi awa.

### Tarea 1

- Kico bo ta mira?  
Cua palabra falta den e frase?
- Lesa e frase bou di cada plachi.
- Busca e palabra(nan) cu falta den e rij di palabra akibou.
- Skirbi e palabranan den bo buki di tarea.

### Tarea 2

Kico ta e diferencia?


- Tin diferencia entre awa di tubo y awa di pos?
- Kico e diferencia ta? Cua di dos abo ta bebe?

• bari di awa

• bendedo di awa

• bleki

• garoshi di awa



1

Mi ta mira un burico  
hala un ... cu un ...

2

E ... ta bende awa  
dushi.

3

E ta yena un ... cu  
awa.

4

Mi ta mira un ... riba  
un ... di awa.

5

Mi ta mira un ...

6

Antes tabata pomp  
awa for di ...

### Tarea 3

Bo sa e contesta?

Skirbi e frasenan den bo buki di  
tarea.

- Awa di lama ta ...
- Awa cu nos ta bebe ta awa ...
- Ora nos pone awa den frishider,  
e ta bira ...
- Ora nos pone awa den freezer, e  
ta bira ...
- Antes no tabatin frishider. Nan  
tabata warda awa den ...

• molina

• pomp di awa

• pos

• rembak

## 5 Pensa bon

### 5a Crucigrama

- Lesa e frase y pensa e palabra cu mester yena den e hokinan horizontal.
- Skirbi e palabranan den bo buki di tarea.
- Den e hokinan shinishi bo por lesa vertical (di ariba bay abou) un palabra nobo.
- Skirbi e palabra na final di frase 6.

		1						
2								
	3							
		4						
5								

1. E ... ta hala e garoshi di awa.
2. Riba e pos tin un ...
3. Ta warda e awa di yobida den un ...
4. Pa traha te ta ... e awa prome.
5. Den ... tin awa friu.
6. Antes tabata bende awa na ...


### 5b Bo sa e contesta?


- Skirbi e contesta den bo buki di tarea.

Ehempel:

Awa cu ta bin fo'i dam, nos ta yama aw'i dam.

1. Awa cu ta sali for di pos, nos ta yama ...
2. Awa cu habon aden, nos ta yama ...
3. Awa cu nos ta bebe, nos ta yama ...
4. Awa cu tin den un coco, nos ta yama ...
5. Awa cu ta hole dushi, nos ta yama ...
6. Awa salo cu pisca ta biba aden, nos ta yama ...
7. Awa cu ta cay for di shelo, nos ta yama ...





### 5c Cambia palabra

- Cambia e palabranan *cursiva* den tur frase.
- Bo por scoge for di:  
*mi – bo – e – nos – nan*
- Bo por scoge un palabra mas cu un biaha.
- Skirbi tur frase den bo buki di tarea.

1. *Papa y Adri* ta combersa tocante awa.
2. *Adri* tin hopi pregunta.
3. *Mi bisawelo y bisawela* no tabatin frishider.
4. Shon Ben tabata bende *mi welonan* awa.
5. *Ben* semper tabata bisa: "Awa di Ben ta dushi pa bebe. "
6. Na cas *ami, mami cu papi* si tin frishider.



### 5d Kico bo ta yena?

- Yena e palabra corecto den tur frase.
- Bo por scoge for di:  
*mi – bo – e – nos – nan*

1. Unda Mama cu Madushi ta?  
... a bay paga recibo di awa.
2. Unda e parha gusta baña?  
... gusta baña den un scoter cu awa.
3. Bo sa na unda ami, Rey cu Fifi a bay landa?  
... a bay landa na Baby Beach.
4. Unda abo gusta landa?  
Mi sa caba, ... gusta landa den piscina.
5. Unda papi y mami ta cumpra awa na boter?  
... ta cumpra awa na supermercado.
6. Bo sa na unda ami ta warda mi boter di awa?  
... ta warda mi boter den frishider.



## 6 Skirbi bon

### 6a Letter g

- Pensa palabra cu ta cuminsa cu ga – go – gu.
- E palabranan mester zona manera gala - golpi - gusta.
- Skirbi e palabranan den e kolomnan den bo buki di tarea.

ga	go	gu


### 6b Tres kolom di palabra

- Traha tres kolom di palabra.
- Wak den cua kolom cada palabra ta pas.
- Traha e tarea aki den bo buki di tarea.

djey, tinashi, djaca, chapi, shimarucu, djindja, chuculati, shoco, djis, chuchubi, chupon, shinishi, cashi, podjo, cacho

ch	dj	sh
chup	djente	shelo







### 6c Pensa bon y skirbi bon

- Lesa e frasenan akibou.
- Tin palabra den e frasenan cu falta dos letter cu ta forma un zonido: ch – dj – sh
- Yena e combinacion di letter (dos).
- Traha e tarea den bo buki di tarea.

1. Shon Ben tin un garo--i di awa.
2. Su garo--i ta --ini--i.
3. Prinses Maritza ta yena e com--i cu awa.
4. --on Ben ta stiwa e blekinan riba ca--i.
5. Prinses Maritza ta frega su --entenan cu aw'i tina--i.
6. Un --u--ubi ta bebe awa cerca --on Ben.

### 6d Skirbi e frase bon

- Traha un frase cerca cada plachi.
- Skirbi e frasenan den bo buki di tarea.




## 1 Scucha y papia

### Awa pa Pedro

Pedro ta spierta mainta bon spanta.  
E no a drumi casi nada.  
E ta lanta cada bes for di cama  
pa e para wak pafo.  
E kier pa solo sali, ma na e mesun  
momento e tin miedo pa di dia habri.  
Pedro tin miedo di bay scol.

Ta kico a pasa Pedro?  
Dicon e tin miedo di bay scol?





- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.

## 2 Mi por lesa

### Awasero ta tenta Flohito

“Esta dushi mi ta colga aki”, Flohito, un luiaard, ta bisa, mientras cu e ta zoya bay bin na un taki diki di palo.

“Flohito”, e otro animalnan ta bisa, “wak shelo. Tin hopi nubia. Djis aki awa ta bay cay. Miho bo bay sconde. Si bo muha, bo ta bira malo.”

“Ay, no”, Flohito ta contesta, “mi no ta traha di sucu, mi no ta smelt.”

“Bo cuenta”, e bestianan di selva ta bisa, mientras cu nan si ta core bay sconde. “Ora awa cuminsa cay, lo bo muha sigur.”

Pero Flohito ta hari so y e ta sigui zwaai bay bin na e taki diki.

Ora pa ora shelo ta bira mas nubla. Y no ta tarda hopi cu e prome drupnan diki di awa ta cuminsa cay. “Flohito, amigo, bay sconde”, Prikichi ta bolbe purba conseh’e for di su neishi.

“Mi a bisa bo caba cu mi no tin miedo di poco drup di awa kens asina”, Flohito ta contesta.

Esey Awasero ta tende. “Animal fresco”, Awasero ta grita rabia, “lo mi siña bo un bon les. Tur animal tin miedo di mi. Tur animal ta bay sconde ora mi cay. Dicon abo no?”

Y mesora Awasero ta cuminsa basha duro, masha duro mes. Henter anochi awa ta sigui yobe.

Ta te ora Awasero mira Flohito baha for di e palo, cana bay busca un luga p’e sconde, e ta stop di cay poco.

“No kere cu bo a gana”, Flohito ta bisa Awasero cu un cara hari. “Ta hamber mi tin, nada otro. Si mi bay sinta un rato bou di e blachinan di e palo grandi aki, mi por come mas trankil.”

Esey ta net loke Flohito no mester a bisa. Awor si Awasero ta bira furioso. “An, si? Ta pa come bo ta baha?”, Awasero ta grita. “Lo mi percursa pa bo no haya niun blachi pa bo come.” Y na mes momento lamper ta cuminsa corta, mientras awa ta cuminsa yobe masha duro mes.

Den un rato di ora Flohito ta para te na su barica den awa. Toch e ta haci manera e no tin cu nes. E ta subi bek den palo. Y aunke su barica ta gruña di hamber, e ta keda colga trankil di dje na e mesun taki diki.

Flohito ta cuminsa sinti poco friu si y de bes en cuando e tin cu tosa. Pero e ta consola su mes cu e pensamiento cu djis aki Biento lo bin y supla Awasero leu.

Y asina ta sosode tambe. Biento ta cuminsa supla despues di un par di



ora. Biento ta supla asina duro cu tur nubia ta bay. E lana papa muha di Flohito tambe ta seca. “Pff”, Flohito ta bisa contento, mientras e ta zoya bay bin na su taki, “porfin Awasero a bay. Biento a core cu ne. Mi a soporta basta, pero mi a mostra Awasero si cu un luiaard no tin miedo di awa.”



### 3 Bo a compronde?

- Lesa e cuenta prome.
- Despues contesta e preguntanan.

#### Pregunta

1. Kico Flohito ta haci?
2. Dicon e otro animalnan ta bisa cu Flohito tin cu bay sconde?
3. Kico Flohito ta contesta?
4. Dicon Awasero ta rabia?
5. Kico Awasero kier?
6. Dicon Flohito ta baha for di e palo?
7. Kico Flohito ta bisa cu Awasero ta rabia asina hopi?
8. Cu kico Flohito ta consola su mes?
9. Kico Biento ta haci?
10. Ta kico Flohito kier a mostra Awasero?
11. Dicon e luiaard aki yama Flohito?
12. Den ki forma mas awa por yobe? Awa ta yobe, awa ta cay, ...
13. Kico bo ta haya di e comportacion di Flohito? Y pakico?

## 4 Vocabulario

### Bril di airco

“Mi sa caba kico mi ke bira dia mi bira grandi”, Ivo ta bisa. E ta sinta patras den auto.

Mama ta wak e den spiel. “Bo ke conta mi?”, e ta puntra.

“Mama”, Ivo ta sigui, “ya ta hopi tempo cu mi ta bisti bril. Mi mester hunga cu cuidou pa e no kibra. Tur ora cu nos bay landa, mi mester percura pa kit’e prome cu mi drenta awa.

Tin ora mi ta lubida y mi ta bay bou di douche cu ne.

Nada di esey no ta dje fastioso ey. Pero ora mi sali for di auto friu y drenta den e calor di pafo, mi no por mira nada mas.

Ta yen di gota chikito asina di awa tin riba mi glas di bril. Esey si ta masha laf!”

“Anto kico esey tin di haber cu loke bo ke bira ora bo bira grandi?”, Mama ta puntra.

“Wel”, Ivo ta bisa, “mi ta bay bira trahado di bril. Un bril special. Bril di airco.”

Mama ta hari y e ta bisa: “Nos por core cu bentana habri tambe si bo ke.”


“Core den auto calor? Esey si ta un cos cu mi tin cu pensa un tiki, Mama”, Ivo ta contesta.

1




Awa di yobida nos ta yama ...

2



Awa di cranchi, nos ta yama ...



3




Awa di boter cu tin mineral aden nos ta yama ...

### Tarea 1

Kico bo ta yena?

- Lesa e frase bou di cada plachi.
- Busca e palabra cu falta den e rij di palabra akibou.
- Skirbi e palabranan den bo buki di tarea.

4



Awa cu a vries nos ta yama ...

### Tarea 2

Bo sa e contesta?

- Busca e palabra cu falta den cada frase den e rij akibou.
- Skirbi e palabranan den bo buki di tarea.

5



Awa cu ta herbe, ta evapora. Esey nos ta yama ...

Awa di dam ta awa ...

Awa den lama ta awa ...

Awa di pos por ta medio salo, medio dushi. Awa di pos por ta ...

6



Awa di lama ta evapora, lanta bay shelo bira ...

• dushi

• ijs

• nubia

• salo

• vapor

## 5 Pensa bon

### 5e Kico bo ta yena?

- Den cada frase falta un palabra.
- Busca e palabra cu falta.
- Skirbi e palabra corecto den bo buki di tarea.

Bo por scoge di:

awa – awa friu – awasero – cayente – ijs – lauw – raspou

### Awa

1. Awa cu nos pone den freezer, ta bira ...
2. Ijs cu dirti, ta bolbe bira ...
3. Ijs raspa cu stropi nos ta yama ...
4. Awa cu ijs nos ta yama ...
5. Awa herbi ta awa ...
6. Ora awa herbi fria un tiki, e ta bira awa ...
7. For di nubia pisa ... ta cay.


Bo por scoge for di:

hagel – herbe – muha – sneeuw – yobe

### Mas awa

8. E awa ta evapora y bira vapor, pasobra el a ...
9. Ora awasero ta cay, nos ta bisa cu awa ta ...
10. Na tera hopi friu tin biaha ... ta cay.  
Tur caminda ta bira blanco.
11. Ora pipita di ijs cay for di shelo,  
nos ta bisa cu ... ta cay.
12. Ora awa ta yobe duro, tur cos ta ...





### 5f Cua expresion bo ta scoje?

- Lesa bon kico e tres expresionnan akibou kiermen.

- Baha na awa*: bay lihe sin bisa nada.
- Coy awa*: haya bo mes den dificultad.
- Yora awa cuater cuater*: yora cu masha verdriet.

- Lesa e frasenan akibou.
- Cua expresion bo tin cu yena na cada frase?

- Bo ta yama bo ruman y bis'e cu e tin cu bin cas bek.  
Bo ta bis'e: "Si bo no bini, bo ta ..."
- Mi ruman muhe a wak television henter merdia.  
E no a traha su huiswerk.  
Ora Papa a yega cas, el a haya straf.  
Awor e ta ...
- Papa a bisa cu no ta sali for di cura.  
Asina cu mi ruman Ruben a wak Papa sali, el a sali scondi bay toch cerca bisiña.  
Ruben a ...
- Henter dia Mario a bebe refresco sin pidi.  
Atardi su mama ta habri frishider.  
E ta ripara cu no tin refresco mas.  
Su mama ta rabia y Mario ta ...



**6 Skirbi bon**

**6e Traha dos kolom di palabra**

E letter **i** tin dos diferente zonido:

**i** den tiki y **i** den lip.


- Akibou tin un rij di palabra cu **i**.
- Wak den cua kolom cada palabra ta pas.
- Traha e tarea aki den bo buki di tarea.

bisa – bril – buki di tarea – klip – limpi –  
slip – snik – timon – tip – tira – triki –  
trinta – trip – tripa – wipwap – wiri



i di tiki	i di lip





### 6f Skirbi palabra completo

- Den e rijnan akibou tur palabra ta parti na silaba.
- Skirbi e palabranan completo den bo buki di tarea.

a-wa	mi-ne-ral	a-wa-ca-ti	la-ba-ma-no
rem-bak	ti-na-shi	wa-ra-wa-ra	he-li-cop-ter

### 6g Parti palabra na silaba

- Parti e palabranan den e rijnan akibou na silaba.
- Bisa e silabanan na bos halto prome.
- Skirbi e palabranan den bo buki di tarea.

diriti	bendedo	awasero	spantaparha
hagel	burico	bisawela	pensamento
purun	garoshi	finguifingui	peligroso

### 6h Nos alfabet



a b c d e f g h i j k l m n ñ o p q r s t u v w x y z

- Skirbi e palabranan akibou den orden alfabetico.
- Hacie asina: awa, bari, ...
- Traha e tarea den bo buki di tarea.

awa – wanglo – mineral – yobe – edad – sneeuw – bari –  
 casca – dushi – vapor – galiña – unico – number –  
 helm – tempo – felpa – idioma – jong – rosa – xylofon –  
 keshi – quiz – zebra – prinses – ocho – lachi – ñapa







## 1 Scucha y papia

### Combersacion den kring

- Awe bo ta bay papia den kring.
- Bo ta bay papia tocante importancia di awa.  
Nos mester di awa tur dia y nos bestianan tambe.
- Conta kico bo ta haci cu awa na cas.
- Den cua parti di cas tin cranchi di awa? Dicon eynan?
- E matanan den cura tambe mester di awa. Bo tin cu muha nan y spuit nan. Ken sa yuda muha mata na cas? Con esey ta bay?
- Kico ta pasa cu un mata ora e no haya awa?

### Regla di combersacion

*Niun di nos no ta keda mucho largo na palabra, pasobra tur hende tin gana di bisa algo.*

## 2 Mi por lesa

### Dal un baño

Hopi aña pasa e casnan na Aruba no tabatin tubo di awa ni cranchi. P’esey no tabatin douche tampoco.

Den baño of den cushina tabatin un tobo grandi.

Esey e hendenan tabata yena cu awa pa baña aden.

E muchanan ta baña prome y tur tabata baña den e mesun awa.

Despues e hende grandinan tabata na beurt.

Den baño no tabatin labamano. Ta den camber tabatin un mesita cu un punchero. Un punchero ta un comchi special pa laba man y cara aden. Bo tabata yena e punchero cu awa for di un canica.

No ta tur hende tabatin baño. P’esey na hopi pais di mundo tabatin cas pa baña. Un cas pa baña tabata un edificio grandi caminda bo por a bay baña. Eynan semper tabata hopi druk. No ta baña so e hendenan tabata bay baña eynan. Nan por a haci deporte y haya masashi tambe. Awendia nos ta baña tur dia. Y hasta mas cu un biaha pa dia. Antes e hendenan no tabata baña asina hopi.

Awa tabata mucho costoso. Ta na bleki mester a cumpra awa.

Hopi aña pasa, leu for di Aruba, tabatin hasta hende cu no tabata baña mes, pasobra no tabatin suficiente awa.

E hendenan ey no tabata hole bon. Pa kita e holo stinki, nan tabata uza perfume. Nan tabata tapa peishi y mancha cu puiro. Riba nan cabey, cu nan no tabata laba, nan tabata pone un peluca blanco.

Bo mes ta compronde cu esey no ta bon. Si bo keda sin baña, bo no ta hole stinki so, pero bo por bira malo tambe. Antes esey tabata sosode hopi.

Te ainda tin pais na mundo cu ta asina pober cu nan hendenan no tin baño na cas. Nan tin cu baña den riu. Nan ta laba nan paña den e mesun awa cu nan ta baña aden.

Mayoria di cas riba nos isla tin un baño cu un douche, un labamano y un w.c. Danki Dios cu awendia casi tur hende ta compronde cu nan tin cu baña.

Baña ta dushi, baña ta bon! Percura pa bo baña tur dia.



### 3 Bo a compronde?

- Lesa e cuenta prome.
- Despues contesta e preguntanan.

#### Pregunta

1. Dicon no tabatin douche na cas na Aruba hopi aña pasa?
2. Con e hendenan tabata baña antes?
3. Den baño no tabatin un labamano. Unda e hendenan tabata laba nan man?
4. Kico ta un punchero?
5. Na hopi pais tabatin cas pa baña. Kico ta un cas pa baña? Kico mas nan tabata haci eynan?
6. Dicon hopi aña pasa e hendenan no tabata baña asina hopi?
7. Leu for di Aruba tabatin hende cu no tabata baña mes. Dicon no?
8. Kico nan tabata haci pa kita e holo stinki?
9. Bo sa un otro palabra pa w.c.?
10. Dicon bo mester baña?
11. Dicon bo ta kere cu aki na Aruba nos tin cu baña mas cu un biaha pa dia?
12. Dicon bo por bira malo si bo keda sin baña?
13. Con abo ta sinti ora bo caba di baña?



## 4 Vocabulario

### Higiene

Mama: Miki, bay baña. Ta cinc'or!

Miki: Dicon mi tin cu baña atrobe? Mi a baña mainta caba! Tanchi a conta mi cu na Hulanda mucha no ta baña dos biaha pa dia.

Mama: Na Aruba bo ta core den solo. Bo ta soda y bo pañanan ta hole sodo. P'esey abo si tin cu baña un biaha mas prome cu bo bay drumi. Na Hulanda ta friu y bo no ta soda hopi.

Miki: Ma dicon nos tin cu skeiro djente tres biaha pa dia anto? Nos djente no ta sushi toch?


Mama: Pasobra parti di bo cuminda ta keda pega memey di bo djente. Bacteria, bestia chikito cu bo no por mira, ta haci fiesta den bo boca. Nan por hasta dañá bo djentenan. P'esey ta bon pa uza hilo di djente tambe pa limpia e espacio entre bo djentenan.

Miki: Mi conoce un mucha cu no ta laba su man ora e bay baño. Esey no ta bon, no, Mami?

Mama: No, mi yiu, tur esaki tin di haber cu higiena. Bo tin cu uza awa. Awa pa baña, awa pa laba man, awa pa spula boca ora bo skeiro djente. Sin awa bo no por tene curpa limpi. P'esey awa ta asina importante.

Bon, bo ta bay baña awor, Miki?

Miki: Mi ta den baño caba, Mami!



1



Ora bo caba di uza  
w.c. bo tin cu flush,  
baha e ... y e ...

2



Ora bo caba di bay  
w.c., bo tin cu laba bo  
man na e ...

3



Ora bo ta baña, bo ta  
para bou di un ...

4



Tur siman bo tin cu  
laba bo cabey cu ...

5



Tres biaha pa dia bo  
tin cu skeiro djente y  
limpia bo djente cu ...

6



Pa bo huñanan bo ta  
uza un ... of un ... y un ...

### Tarea 1

Kico bo ta yena?

- Lesa e frase bou di cada plachi.
- Busca e palabra(nan) cu falta den e rij di palabra akibou.
- Skirbi e palabra den bo buki di tarea.

### Tarea 2

Pakico bo mester di awa?

Pa bo flush w.c. mester di awa. Pa laba man, baña, laba cabey, skeiro djente y limpia bo huñanan tambe bo mester di awa. Pakico mas bo mester di awa? Pensa seis cos y skirbi nan den bo buki di tarea.

- labamano
- shampoo
- sker di corta huña
- tapa di toilet

## 5 Pensa bon

### 5g Kico bo ta yena?

- Den cada frase falta un palabra.
- Busca e palabra cu falta den e rij akibou.
- Skirbi e palabra corecto den bo buki di tarea.

Bo por scoge for di:

canica di awa – douche – labamano – punchero – tempo – tobo – w.c.

### Antes

1. Antes e hendenan no tabatin ...
2. Nan tabata baña den un ...
3. Tampoco no tabatin ... pa laba man.
4. Nan man nan tabata laba den un ...
5. E comchi ey nan tabata yena cu un ...
6. Antes no tabatin ... moderno tampoco.
7. Mi ta contento cu mi no tabata biba e ... ey.




Bo por scoge for di:

baña – corta – feila – flush – laba – limpia djente – shampoo – skeiro djente

### Awor

8. Awendia tur hende sa cu bo mester ... tur dia.
9. Bo cabey bo tin cu laba cu ...
10. Tambe bo mester ... tres biaha pa dia cu pasta di djente.
11. Bo tin cu ... cu hilo di djente.
12. Cu un sker di huña bo ta ... bo huñanan.
13. Tambe bo por ... nan cu un feilo di huña.
14. Ora bo caba di bay toilet, bo tin cu ... e w.c.
15. Despues bo ta ... bo man na e labamano.





### 5h Cambia palabra

Dina kier conta un storia, pero diripiente e ta lubida diferente palabra.

Na lugá di e palabranan ey, Dina ta uza e palabra *cos*.

- Yuda Dina. Ta kico e kieren cu *cos*?
- Pone den tur frase un otro palabra pa *cos*.

1. Mi a tende *cos* ta core den baño.
2. Ta un *cos* tabata habri.
3. E *cos* a hera yena cu awa.
4. Ta mi ruman a lubida di cera e *cos*, ora cu el a bay laba su cara.
5. Si mi no a bin na tempo, henter nos *cos* lo a yena cu awa.



### 5i Yena e palabra corecto

- Den cada frase falta un palabra.
- Busca e palabra cu falta.
- Skirbi tur frase den bo buki di tarea.

Bo por scoge for di:

*como cu – cu – maske – si – tanten cu – te ora*

1. Bo por sinta lesa buki, ... bo tata no bin busca bo.
2. Mario a conta ... den vakantie el a cana riba pista di ijs.
3. ... bo yora awa cuater cuater, bo no ta bay cine awe.
4. ... bo ta puntra mi asina nechi, bo por fia mi snorkel.
5. Mama a keda core rond, ... el a haya un lugá pa parkeer su auto.
6. ... bo ke keda seco, bo tin cu warda awasero pasa.



## 6 Skirbi bon

### 6i Lesa y hala un strepi

- Den e frasenan akibou tin e palabra awa scondi den varios palabra.
- Hala un strepi bou di tur palabra unda e palabra awa ta scondi.
- Traha e tarea den bo buki di tarea.

1. Awasero a cuminsa cay masha duro.
2. El a hawa su lenso.
3. Tin hende ta bisa 'tawata' en bes di 'tabata'.
4. Un tawa ta un sorto di palo di coco.
5. Sangura a pic'e y awor e ta grawata su man.
6. Tur merdia nos ta sinta bou di e palo di cawara.
7. Mi ta mira dos warawara den un palo halto.
8. Mi gusta come pan cu awacati.
9. Un cawama ta un sorto di turtuga.
10. Na Surnam tin un palo cu yama awara.



### 6j Cua letter bo ta yena?


Mi tin un **ou** color **blauw**.

E diptongonan **ou** – **au** ta zona mescos ora nos papia.

- Den e frasenan akibou tin palabra cu **ou** y **au**. Pensa bon.
- Skirbi e frase completo den bo buki di tarea.

1. B.. di e stoel tin un boter.
2. Nos juffr..w tin un ..to berde.
3. Den luna di ..gustus nos ta biaha.
4. E som aki no ta bon, e ta f..t.
5. E p..wies no ta den su h..la.
6. Un t.. di cabrito ta pasa den nos cura.
7. Ken ta ..tor di e buki aki?





## 6k Lesa y skirbi

- Lesa e frasenan akibou bon.
- Skirbi e palabranan cu tin un color, nechi y sin fout den bo buki di tarea.



1. Den **selva** tin palo **halto**.
2. E palonan ta cas pa **varios** animal.
3. Un **luiaard** tambe ta biba den selva.
4. E bestia aki gusta **colga** na taki.
5. Pa cuminda e no mester bay **leu**.
6. Ta **blachi** cu fruta so e ta come.
7. Un luiaard no tin **miedo** di **awasero**.
8. Su lana **special** ta percura cu e no ta **muha** mucho.

## 6l Dictado

- Awor bo ta bay traha un dictado.
- Bo maestra/o ta ripiti e palabranan cu abo tin cu skirbi.

## 6m Busca palabra



## 1 Scucha y papia

### E campeon di lama

Rey di lama, Neptuno, kier sa cua bestia di lama ta esun mas lihe.


Pa motibo cu tin mucho bestia cu kier participa, Rey Neptuno mester haci un seleccion.

Rey Neptuno ta pensa e asunto bon.

Despues e ta participa ken ta bay tuma parti na e competencia: un tribon, un govi, un pisca bulado y un cocolishi.

Ta ken lo gana e competencia aki?





- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.



### 2 Mi por lesa

#### Dam a kibra!

Awe Nilo no tin scol.

Radio a anuncia cu no tin scol.

Ta hopi dia caba awa ta cay sin stop.

E situacion ta serio. Henter barío ta alerta.

Den Nilo su barío tin un dam grandi. E dam no tin mas luga pa carga awa.

Awa a cuminsa subi tera.

Si awa sigui cay asina duro, e dam por kibra y hopi cas lo yena cu awa.

Tur hende ta prepara pa e calamidad.

Nan ta pone saco di tera canto di tur muraya y porta pa awa no drenta cas. Nan ta claba tur e bentananan.

Merdia Nilo ta bay supermercado cu Mami. Ta hopi druk. Tur hende ta yena garoshi. Tur hende ta papia di e dam cu por kibra.

Banda di och'or Nilo ta subi cama. E no kier drumi, ma e ta hopi cansa. Su wowonan ta dal cera y e ta pega soño.

Pero meyanochi Mami cu Papi ta lanta Nilo.

“Kico a pasa?”, Nilo ta puntra yen di soño.

“Nos cas a cuminsa yena cu awa”, Mami ta bisa, “e dam a kibra.”

Nilo ta bula baha for di cama. Su pidjama ta muha mesora. Awa ta yega te na su rudia. “Kico nos tin cu haci, Papi?”, e ta puntra spanta.

“Nos ta bay sinta pafo riba e dak plat di garashi”, Papi ta bisa.

“Ya mi a pone un trapi caba canto di muraya. Eynan nos lo warda yudansa.”

Nilo su curason ta bati duro. Kico ta bay pasa?

Pafo nan ta subi e trapi cu Papi a pone canto di muraya di e garashi.

E casnan mas abou ta bou di awa caba. Di leu Nilo ta mira un homber sinta den palo.





Nilo ta tembla. E tin friu. Su pidjama ta papa muha.

Nan ta sinta pa basta rato caba, ora diripiente Mama ta grita: “Wak, un boto! E ta bin akibanda.

Tin bombero aden!”

“Nan a bin salba nos”, Nilo ta grita contento.

Y asina ta sosode. E anochi ey y e siguiente dianan Nilo, Papi cu Mami ta bay keda na un scol den bisindario. Tin hopi hende di e bario den e scol.

Hopi di nan a perde tur cos cu nan tabata tin.

Despues di varios dia Nilo por bay cas bek. Nunca mas lo e no lubida loke a pasa dia e dam a kibra.

### 3 Bo a compronde?

- Lesa e cuenta prome.
- Despues contesta e preguntanan.

#### Pregunta

1. Con Nilo a haya sa cu no tin scol?
2. Kico tin den Nilo su bario?
3. Kico por pasa cu e dam si awa sigui cay?
4. E hendenan tabata prepara. Kico nan tabata haci?
5. Dicon Nilo no kier drumi?
6. Kico ta pasa meyanochi?
7. Kico Mami ta conta Nilo?
8. Unda nan ta bay sconde pa scapa di e awa?
9. Kico Nilo ta mira ora nan ta sinta riba dak di e garashi?
10. Dicon Nilo ta tembla?
11. Kico Mami ta grita diripiente?
12. Unda Mami, Papi y Nilo ta bay keda?
13. Kico Nilo lo no lubida?
14. Kico ta un calamidad?
15. Abo of famia di bo a yega di pasa den un calamidad? Conta loke a pasa.



## 4 Vocabulario

### Landa bou di awa

Robby ta sinta cu cara tristo.  
Awe ta dia di bay les di landamento.  
Robby gusta landa si, pero e no kier bay bou di awa.

Den les di landamento e muchanan mester landa un pida bou di awa.  
Meneer Benny ta nan instructor.  
Nan tin cu pasa den un hoepel, cu Meneer Benny a pega den fondo di e piscina. Djey nan mester bin bek ariba.

Ora yega momento pa bay bou di awa, semper Robby ta sinti su curpa malo. Asina tanto miedo e tin.  
Instructor Benny a purba kita Robby su miedo na tur sorto di manera. Ma nada no a yuda.

Awe Meneer Benny a bin cu algo nobo pa kita Robby su miedo.  
El a cumpra un bril di landa chikito.  
Cu e bril Robby por mira bon bou di awa.

Tambe Meneer Benny a cumpra un submarino blauw scur.

Robby ta masha contento.  
E ta pone e submarino den e piscina.  
Mesora e submarino ta sak bay fondo.  
Sin pensa Robby ta bay bou di awa pa bay coy su submarino.  
Ora e bin bek ariba, tur mucha ta bati man.  
Robby ta hari feliz y contento.  
Porfin su miedo a kita.



### Tarea 1


Kico bo ta mira?

- Lesa e frase bou di cada plachi.
- Busca e palabra cu falta den e rij di palabra akibou.
- Skirbi e palabranan den bo buki di tarea.

• chaleco salbabida

• cintura di corki

• haci ballet



**Tarea 2**

Bo sa e contesta?

- Kico un submarino por haci cu un barco no por haci?

**Tarea 3**

Menciona ramo di deporte.  
Den piscina tambe bo por haci deporte.

- Bo por menciona tres ramo di deporte cu bo por practica den piscina?
- Skirbi e contesta den bo buki di tarea.
- Traha un pintura acerca.

- piscina
- salto
- springplank
- trapa awa

## 5 Pensa bon

### 5j Completa frase

- Completa e frasenan akibou.
  - E prome frase ta un pregunta.
- E di dos frase ta e contesta di e pregunta ey.  
Scoge for di e palabranan akibou.

cuanto tempo – cu kico – ki dia – pakico – unda

- |                               |                                    |
|-------------------------------|------------------------------------|
| 1. ... Reno a laba su cabey?  | Reno a laba su cabey cu shampoo.   |
| 2. ... bo no ta na tempo?     | Pasobra mi a bay muha mata.        |
| 3. ... e webo tin cu herbe?   | E webo tin cu herbe cinco minuut.  |
| 4. ... bo ruman ta laba auto? | Mi ruman ta laba auto cu un gamus. |
| 5. ... e ta biba awor?        | Awor e ta biba na Aruba.           |
| 6. ... Zita a laba paña?      | Zita a laba paña ayera.            |

### 5k Kico bo ta yena?


- Den cada frase falta un palabra.
- Busca e palabra cu falta.
- Skirbi e palabra corecto den bo buki di tarea.

Bo por scoge for di:

ballet acuatico – cintura di corki – cloro – salto – springplank – submarino

1. Ora bo siña landa, bo ta bisti un ...
2. For di un ... bo por bula den awa.
3. Bula y haci un ... den laira ta hopi dificil.
4. ... ta un deporte cu bo ta haci den awa.
5. Un ... ta un boto cu por nabega bou di lama.
6. Den un piscina mayoria di biaha tin awa cu ...





## 51 Cua expresion bo ta scoge?

- Lesa bon kico e tres expresionnan akibou kiermen.

a. *Mi boca ta core awa:*

mi tin masha gana di come algo di smaak.

b. *Cay na awa:* algo cu bo a planea no ta sigui.

c. *Awa di dos bes no sa muha macaco:*

bo no ta comete e mesun fout dos biaha.

- Lesa e frasenan akibou.

- Cua expresion bo tin cu yena na cada frase?

1. Bo papi cu mami a prepara tur cos pa un fiesta den cura. Pero net e dia ey awasero a basha masha duro. Bo a bisa bo mami cu papi: "Nos fiesta a ..."

2. Ayera bo amiga a skirbi masha mahos den su buki di tarea. Pa straf juffrouw a pon'e skirbi tur cos di nobo. Awe si e ta skirbi nechi. Bo ta bis'e: "..."

3. Mi wela a traha un bolo masha dushi. Fo'i ora bo drenta su cas, bo ta haya e holo dushi. Bo tin masha gana di un pida bolo. Bo ta bisa bo wela: "Welita, ..."

4. Nos scol a haya carchi pa bay cine. Tur mucha ta para cla den rij pa bay. Pero e bus no ta bin. Juffrouw ta bisa e muchanan: "Nos biahe a ..."



## 6 Skirbi bon

### 6n Busca palabra y traha frase


- Skirbi e palabra awa memey riba e blachi den bo buki di tarea.
- Skirbi e otro palabranan acerca.
- Cua palabranan bo mes por pone acerca?
- Purba traha frase cu e ocho palabranan.

awa mineral



?


awa di lama



?

awa

?




gota di awa

?



awa di tubo



## 7 Tarea varia

### 7a Cua palabra ta pas?

- Cua di e palabranan akibou tin algo di haber cu e palabra awa?
- Skirbi nan den bo buki di tarea.



awacati – awasero – bari di awa – bril di w.c. – cintura di corki – dam – douche – feilo di huña – hilo di djente – luiaard – nubia – pomp – punchero – rembak – salbabida – saluda – selva – sneeuw – springplank – submarino – tinashi


### 7b Charada

Tin awa cu ta core  
 awa cu ta cay  
 awa cu ta basha  
 cu ta fingui  
 cu ta plama  
 cu ta spuit  
 tin awasero, awa keto  
 awa bruto, awa di wowo, awa di holo,  
 awa bendita, awa manera un spiel,  
 awa brak, awa dushi, aw'i lala  
 y un cantidad enorme mas  
 di tur sorto di awa.

Awor ken por nombra  
 un awa cu por colga?







## 1 Scucha y papia

### Combersacion den kring

- Awe bo ta bay papia den kring.
- Bo ta combersa tocante *aventura*.
- Ki sorto di aventura bo a yega di pasa aden?
- Tin buki di aventura. Bo a yega di mira of lesa un buki asina?
- Bo a yega di wak un pelicula tocante aventura?
- Kico ta dushi di un aventura?
- Kico no ta dushi di un aventura?

### Regla di combersacion

*Nos ta papia cla pa tur hende por tende nos bon.*

## 2 Mi por lesa

### Aventura den cueba

“Ay, mi ta ferfela mi mes”, David ta keha. “Mi no tin nada di haci.”

“Si”, Tobias ta agrega, “ta laf pa sinta na cas henter dia.”

E dos amigonan ta sinta riba trapi di veranda. Nan tin vakantie for di algun dia caba.

“Bo sa kico nos por haci?”, Tobias ta bisa diripiente. “Nos por bay subi e sero den mondi tras di mi cas.

Y despues nos por bay wak den e cueba cu tin den e sero.”

“Bay wak den cueba!/? Bo sa kico nan ta bisa, toch?”, David ta puntra.

“Den e cueba ey tin un spoki ta biba.”

“Ay, spoki kico”, Tobias ta bisa na harimento. “Spoki no ta existi. Mi ta kere cu ta miedo bo tin!”

“Miedo, ami?”, David ta bisa rabia, “n’ ta berdad! Laga nos ban mesora. Lo mi muestra bo cu ta ami ta esun cu mas briyo.”

Na e mesun momento David ta cana bay den cushina. E ta yena un termo cu awa y e ta prepara algun sandwich. “Mi ta cla”, e ta bisa Tobias despues di cinco minuut.

E dos amigonan ta sali fo’i cas. Mama ta den cura ta muha mata.

“Mama”, David ta bisa, “mi ta bay cu Tobias. Nos ta bay hunga den mondi tras di su cas.”

“Ta bon”, Mama ta bisa, “basta cu boso no haci nada peligroso.”

Tobias no ta biba mucho leu. E duo ta cana bay derechito den e mondi tras di su cas. Ta keto.

Ta manera tur bestia di mondi ta na soño. Solo ta kima ora e amigonan cuminsa subi sero. Nan mester wak bon unda nan ta cana. Tin mata cu sumpiña y e berea ta hopi smal.

Despues di un ora nan ta yega papa soda na entrada di e cueba.


“Ainda bo por bay bek”, Tobias ta tenta David. David ta hala rosea pisa, pero despues e ta bisa cu hopi briyo: “Laga nos drenta.”

Tobias ta cana bay dilanti. David ta siguie.

Den su man e tin un foks chikito.

Den e cueba ta scur y humedo. E dos amigonan ta cana pocopoco. Riba e murayanan nan ta mira sombra ta balia. “Ta bo mes sombra”, Tobias ta splica David. “Bo no mester tin miedo.”

Despues cu e amigonan a cana un



bon pida, diripiente nan ta tende un zonido straño. Ta manera un hende ta fluit. “Ta ki zonido esey ta?”, David ta puntra, mientras cu e ta lusa cu su foks bay bin.

“Mi no sa”, Tobias ta bisa cu un stem cu ta tembla un tiki. Cu wowo grandi di spanto e duo ta wak rond. Ta e spoki di e cueba?

Diripiente un biento friu ta supla banda di nan horea. “E spoki!”, Tobias y David ta grita pareu. Mesora e duo ta saca un careda. Nan ta core manera ta alma malo ta nan tras.

*E cuenta ta continua.*

### 3 Bo a compronde?

- Lesa e cuenta prome.
- Despues contesta e preguntanan.

#### Pregunta

1. Dicon David y su amigo Tobias ta ferfela nan mes?
2. Kico Tobias ta propone?
3. Dicon Tobias tin cu hari ora David bisa cu tin spoki den e cueba?
4. Kico David ta prepara prome cu nan sali for di cas?
5. Kico Mama a bisa nan prome cu nan a bay hunga?
6. Ta facil pa yega na e cueba? Splica dicon si of dicon no.
7. Kico Tobias ta bisa David ora nan ta para na entrada di e cueba?
8. Di ken e sombranan cu nan ta mira riba e murayanan ta?
9. Dicon Tobias y David ta spanta?
10. Kico kiermen *saca un careda*?
11. Dicon nan a *saca un careda*?
12. Bo sa un otro palabra pa *foks*?
13. Kico bo ta kere cu e zonido straño cu nan a tende ta, realmente?



## 4 Vocabulario

### Pablo Pirata

Pablo Pirata ta na bordo di su barco. Ayera porfin el a logra haya e bahul di tesoro.

Simannan largo Pablo cu su piratanan a busc'e. Nan tabatin un compas magico. Cu e compas nan ta haya sa unda nan ta riba lama. E compas a yuda nan bon den nan buskeda, pasobra e mapa di e tesoro tabata complica. Riba e mapa tabatin un secát grandi pinta, e ta cuidado di e tesoro. E otro piratanan a adverti Pablo cu e secát lo stroba nan sigur di bay cu e bahul. Pero nada no a pasa y awor e piratanan ta kere cu e tesoro ta di nan. "Hisa anker pa nos bay!", Pablo Pirata ta grita.

Lama ta bruto, e barco ta zoya. Pocopoco e ta nabega sali fo'i haf. Pero diripiente poco brasa diki manera taki cu conopi grandi ta lastra subi na bordo. Nan ta lastra derechito bay na e tesoro.

Cu un stem cu ta tembla un di e piratanan ta grita: "Ata e secát, e cuidado di e tesoro!"

E otro piratanan ta keda paralisa. E brasanan gigante di e secát ta gara e tesoro, cuminsa lastr'e bay cu ne.

Pablo Pirata no ta perde pa gana. Mesora e ta tira un net riba e bestia. E otro piratanan ta purba ranca e bahul for di e brasanan diki di e secát. Pero e bestia tin masha forsa.

Krrr, e barco ta zona di tur e peso cu e tin riba dje. Krrr, e barco ta kraak. "Laga e secát bay cu ne numa", Pablo ta grita ansha, "sino nos barco ta sink."

Mesora e secát ta gara su tesoro y ta baha na awa cu ne.

Djey e ta disparce pa semper den lama grandi ...

### Tarea 1

Kico bo ta mira?


- Lesa e frase bou di cada plachi.
- Busca e palabra(nan) cu falta den e rij di palabra akibou.
- Skirbi e frasenan den bo buki di tarea.

• bahul di tesoro

• barco di pirata

• carpachi

• compas



1



Mi ta mira un ...

2



E ... tin un ... riba su wowo. Den su man e tin un ...

3



Riba e barco ta waya un bandera di pirata cu un ... riba dje.

4



E pirata ta wak cu un ...

5



Mi ta mira un ...

6



E piratanan a haya un ... Pero ta e ... a gara e tesoro.

### Tarea 2

Bo sa e contesta?

- Pablo Pirata tin un compas. Pa kico bo ta uza un compas?

- Bo ta bay un fiesta di pirata. Kico bo mester pa bo bisti mescos cu un pirata?
- Skirbi e palabranan den bo buki di tarea.

### Tarea 3

Fiesta di pirata

- Wak e plachi di e pirata den bo buki di tarea.

## 5 Pensa bon

### 5a Cua palabra bo ta yena?

- Den cada frase falta palabra.
- Busca e palabra(nan) cu falta.
- Skirbi e palabra(nan) corecto den bo buki di tarea.
- Bo por scoge for di:



barco di pirata – carpachi – cayon – lapi di wowo – mapa di tesoro –  
placa di oro – spada – verrekijker

1. Un pirata ta nabega den un ...
2. Na bordo tin diferente ... grandi.
3. Riba e bandera di pirata tin un ...
4. Tin pirata cu tin un ... riba nan wowo.
5. Tur pirata ta carga un ... na nan carson.
6. Cu un ... e pirata por wak leu.
7. Un ... ta yuda e piratanan haya e bahul di tesoro.
8. Tin hopi ... den e bahul di tesoro.




### 5b Scoge e palabra di accion corecto

- Scoge e palabra di accion corecto y skirbi e frase den bo buki di tarea.

1. E barco di pirata ta ... riba lama grandi.
2. E bandera ta ... bay bin riba e barco di pirata.
3. Solo a ... caba, ora cu e barco a drenta haf.
4. E piratanan ta ... cu bala di cayon.
5. Nan ta bay ... un tesoro riba un isla.
6. Riba e mapa di tesoro nan ta ... con mester cana.
7. Casi nan no por ... e bahul di tesoro pisa.
8. Na bordo nan ta ... e bahul di tesoro cu un yabi.
9. E secat ta bay cu e bahul cu e piratanan a ...

busca  
carga  
habri  
horta  
lesa  
nabega  
sali  
tira  
waya



### 5c Conta algo

- Ki sorto di barco bo ta mira?
- Di ken e barco ta?
- Unda e barco ta nabega bay?
- Kico e piratanan ta haci?
- Pensa un cuenta awor cerca e plachi akibou. Bo kier conta e cuenta?



### 5d Cua combinacion no ta bon?

- Cua combinacion *no* ta bon y dicon?
- Skirbi e numbernan den bo buki di tarea.

- |                               |                            |
|-------------------------------|----------------------------|
| 1. pirata y lapi di wowo      | 6. bringa y pinta          |
| 2. bahul di tesoro y placa    | 7. haf y avion             |
| 3. zwembroek y dashi di pushi | 8. barco di pirata y cayon |
| 4. drumi y balia              | 9. verrekijker y wak leu   |
| 5. lama y pisca               | 10. come y canta           |

## 6 Skirbi bon

### 6a Comparacion

- Compara e dos plachinan cu tin banda di otro.
- Bisa kico ta mescos y kico ta diferente.
- Skirbi y caba e frasenan sin niun fout den bo buki di tarea.




E auto di Mama no tin ...  
E auto di Papa si tin ...  
E auto di Mama ta color ...  
E auto di Papa ta color ...

Sigui na e mesun manera.  
Skirbi kico mas ta diferente.

Popchi Alisa su cabey ta peña cu dos ...  
Popchi Sofia su cabey ta peña cu dos ...  
Popchi Alisa tin un ... riba su cabes.  
Popchi Sofia tin dos ... den su cabey.

Sigui na e mesun manera.  
Skirbi kico mas ta diferente.




## 6b Mapa di tesoro

Pirata Pablo a bay cu e bahul di tesoro di Rey Carlos.  
El a hiba e bahul di tesoro riba su barco.

- Bo tin cu yuda Rey Carlos haya su tesoro bek.
- Bo tin un mapa di tesoro pa yuda bo.
- Wak y sigui e ruta riba bo mapa.

- Skirbi y caba e frasenan sin niun fout den bo buki di tarea.

1. Rey Carlos tin cu sali for di su ...
2. E tin cu subi e tres ...
3. Despues e tin cu pasa memey di e ...
4. Na caminda e ta mira un ... ta waya.
5. Rey Carlos tin cu crusa e ...
6. Asina e ta yega na e ...



## 1 Scucha y papia

### Unda Gilmer ta?

Ta cinc'or di atardi.

Zuly ta traha tarea di scol den camber.

Mama ta sinta trankil den veranda

cu un copi di koffie y buscuchi di soda.

Asina mi caba di bebe mi koffie,

mi ta lanta Gilmer for di soño, Mama ta pensa.

Un rato despues Mama ta bay den cushina.


E ta basha te pa Zuly y e ta pone dos cuki  
riba un scoter.



Prome cu e hiba nan pa Zuly, e ta wak for di  
bentana.

Dicon tin tanto hende asina na skina di caya?,

Mama ta pensa.

Ta kico a pasa?





- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.

## 2 Mi por lesa

*Continuacion di e cuenta*

### Aventura den cueba

Pero en bes di core sali for di e cueba, David cu Tobias ta drenta bay mas aden.

“Mi no por mas”, David ta bisa morto cansa, pero e ta sigui core toch.

Den nan ansha nan no ta wak bon unda nan ta core. Nan ta lubida di uza e foks. P’esey nan no ta mira e buraco grandi cu tin abou. Tobias ta dal un grito ora e cay den e buraco. “Yuda mi!”, e ta grita bou di yoramento.

Mesora David ta stop di core. Cu su foks e ta lusa riba Tobias. Su cabes so ta sali for di e buraco. “Yuda mi”, Tobias ta bolbe grita. David ta hinca rudia. E ta pone e foks abou. Tobias ta tene David su mannan, pero maske cuanto e purba, Tobias no ta logra sali for di e buraco.

“Bo mester bay busca yudansa”, Tobias ta snik.

“Mi tin miedo”, David ta bisa. “Mi no ke bay mi so. Corda mi topa e spoki na caminda.”

“Si bo no bay, nos tin cu keda pa semper den e cueba”, Tobias ta bisa na yoramento. “Y nos lo muri di

hamber. Niun hende no sa cu nos ta akiden.”

David ta sinti friu. E ta tembla. Su curason ta bati te den su boca, ora cu e coy su foks y cuminsa cana. Pocopoco e ta sigui cana. E ta wak bon na unda e ta cana.

Na e murayanan di e cueba David ta mira raton di anochi colga. E ta lusa rond y diripiente e ta mira un sombra cu un sombre grandi riba muraya. David ta spanta asina hopi cu e ta laga su foks cay.

“Epa, un mucha den cueba. Ta ken bo ta?”, un stem pisa ta puntra. David ta cuminsa yora. “D ... David”, e ta snik. “Me ... Meneer Spoki, n ... no haci mi nada, por fabor!”

E sombra ta grita hari. “Spoki, bo a mira mi pa un spoki? Spoki no ta existi, David.” Y na e mesun momento e sombra ta lusa riba su mes cu e foks. David ta mira un shon cu un sombre riba su cabes.

“Ami ta Meneer Maduro”, e shon ta bisa. “Mi ta studia con raton di anochi ta biba den cueba. Kico abo so ta haci akiden?”

David ta hala un rosea di alivio. Despues e ta conta Meneer Maduro tur cos. “Anto Tobias ta den e buraco ainda”, e ta caba su storia.



“E ora ey nos mester bay yuda bo amigo mesora”, Meneer Maduro ta reacciona.

Un rato despues Meneer Maduro ta rek su mannan y e ta saca Tobias for di e buraco.

“Ddd ... danki, Meneer”, Tobias ta bisa cu un stem tur tembla, mientras cu e ta seca lagrima di riba su cara.

“Bon, chabalitonan”, Meneer Maduro ta bisa, “laga mi muestra boso awor e caminda pa sali. Cueba no ta luga pa mucha hunga.”

“Nos no ta drenta akiden nunca mas, Meneer”, e duo ta priminti. “Asina mi ke tende”, Meneer Maduro ta bisa.

Alivia e amigonan ta sali un rato despues for di e cueba. Y mientras cu nan ta cana bay cas, nan ta yama Meneer Maduro ayo. Tobias ta bisa: “Esaki si tabata suficiente aventura pa henter un vakantie!”

### 3 Bo a compronde?

- Lesa e cuenta prome.
- Despues contesta e preguntanan.

#### Pregunta

1. Dicon Tobias ta cay den e buraco?
2. Con David ta purba saca Tobias?
3. Dicon David tin miedo di bay busca yudansa?
4. Kico ta spanta David diripiente?
5. Kico e stem pisa ta bisa?
6. Kico Meneer Maduro ta conta David?
7. Kico e muchanan ta priminti Meneer Maduro?
8. Kico bo ta pensa di loke Meneer Maduro ta bisa?
9. Cua otro palabra a uza pa *muchanan*?
10. Kico ta e diferencia entre un raton di anochi y un raton?
11. Kico nifica: *su curason ta bati te den su boca*?
12. Ta necesario pa David pidi su mama despensa?



## 4 Vocabulario

### Aventura den mondi

“Nos ta ban cana den mondi awe?”, Tobias ta puntra David, Ben y Tommy. “Ya nos por busca un luga pa campa den nos delaster siman di vakantie.” E amiguitonan no ta laga tempo bay perdi. Nan ta cuminsa cana mesora.

Despues di basta rato nan ta haya un luga cu tur gusta. E luga ta bou di un palo grandi di tamarein. Y bou di dje tin hopi yerba. Nan ta cay sinta den un kring.

Apenas e amigonan ta cay sinta, ata nan ta tende un zonido straño. Tur spanta nan ta wak rond. Ta kico esey ta? Di aleu ta manera un nubia shinishi ta acercando. “Pura, hala un banda!”, David ta grita.

Un tou grandi di bestia ta core pasa banda di nan. Cantidad di cabrito, porco brabo, coneu, djaca y lagadishi. Tur ta core masha duro mes. Mas cu shen parha ta bula pasa bay. Ta manera cu tur bestia ta huy pa algo.

Na e mesun momento David ta haya un holo straño. “Candela! Candela!”

e ta grita. “Mondi ta na candela!” Y t’asina mes. Pocopoco e nubia shinishi scur ta yega mas cerca. Leu aya nan ta mira vlam y chispa di candela. E takinan y e blachinan ta kima. Nan ta tende con e candela ta chispa; tur cos ta kraak. E amigonan tambe ta saca un careda bay tras di e bestianan. Ta hole masha stinki mes. Nan wowo ta cuminsa basha awa. Nan ta perde rosea. Net na e momento cu e amiguitonan ta sinti cu e nubia ta bay alcanza nan, nan ta logra sali for di e mondi. Esta un alivio!

Leu aya nan ta tende sirena di brandweer. “Djis aki nan ta bay paga e candela”, David ta bisa. “Nos a scapa! Esaki si tabata un aventura!”

### Tarea 1

Kico bo ta mira?


- Lesa e frase bou di cada plachi.
- Busca e palabra(nan) cu falta den e rij di palabra akibou.
- Skirbi e palabranan den bo buki di tarea.

• bombero

• brandspuit

• chispa

• kazerne di brandweer



### Tarea 2

Bo sa e contesta?

- Kico mas un bombero por haci banda di paga candela?
- Skirbi e contesta den bo buki di tarea.

### Tarea 3

- Kico un bombero tin bisti?
- Dicon un bombero mester bisti un helm?
- Kico un bombero mester pa paga candela?
- Skirbi e contestanan den bo buki di tarea.

1



Mi ta mira un ...  
E ... ta zona.

2



E edificio di brandweer nos ta yama un ...

3




E ... ta paga candela.

4



For di e hos ta sali un ... di awa.

5



Ora tin candela, tin huma, ... y ...

6



Ora tin candela den un edificio halto, bo mester bula den un ...

• lona salbabida

• sirena

• straal

• vlam


## 5 Pensa bon

### 5e Busca e contesta corecto

- Busca e contesta corecto pa cada pregunta.
- Skirbi number di e pregunta y letter di e contesta corecto banda di otro.
- Ehempel: 1 – e.
- Traha e tarea den bo buki di tarea.



1. Kico bo ta mira ora tin candela?	a. Pa e kibra bentana of porta cu ta duro cera.
2. Con nos ta yama e edificio di brandweer?	b. Bo por tende candela chispa.
3. Pakico un bombero ta uza un hacha special?	c. E mondi por pega candela.
4. Kico bo por tende candela haci?	d. Pa e por sigui hala rosea den un luga caminda tin hopi huma.
5. Ken bo por yama ora bo cas yena cu awa?	e. Bo ta mira huma, vlam y chispa.
6. Dicon un bombero mester bisti un masker special?	f. E edificio yama kazerne di brandweer.
7. Dicon ta peligroso pa cushina den mondi ora bo ta campa?	g. Bo por yama brandweer.



### 5f Punto, signo di pregunta, signo di sclamacion

Bo ta corda ainda?

- Tur frase ta cuminsa cu mayusculo.
- Na final di tur frase tin un punto of un signo di pregunta.
- Awe bo ta siña un signo mas. E signo di sclamacion!



Bo ta skirbi un *signo di sclamacion*

- ora bo ta sclama, grita, spanta of admira algo,
- ora bo ta duna ordo.

mayusculo → Nan ta cana den mondi.

← punto

mayusculo → Kico a pasa?

← signo di pregunta

mayusculo → Candela!

← signo di sclamacion

### E isla inhabita

1. Riba un isla inhabita no tin hende ta biba.
2. Frenk, Bert y Irma tur ta verkenner.
3. Bo sa kico nan mester haci?
4. Nan mester rema bay un isla inhabita.
5. E isla ta masha bunita!
6. E ta keda den lama dilanti di Rogers Beach.
7. Rema bay un isla inhabita.
8. Dushi, yiu!



Skirbi e numbernan den bo buki di tarea.

- Cua di e frasenan akiriba ta caba cu un punto?
- Cua di e frasenan ta caba cu un signo di pregunta?
- Cua di e frasenan ta caba cu un signo di sclamacion?

## 6 Skirbi bon

### 6c Cua palabra ta corecto?


- Wak e plachi bon.
- Lesa e palabranan bou di cada plachi.
- Cua palabra ta bon skirbi?
- Skirbi e palabra corecto den bo buki di tarea.



brandspuit  
 bransdruit  
 brantspuit




kazerne  
 kaserne  
 kazenre




bompero  
 bobmero  
 bombero




mascaro  
 masker  
 mascarada



cripta  
 chispa  
 crepeta



hoema  
 huna  
 huma




canon  
 cayon  
 cañon



verrekijker  
 verekeiker  
 verekijker



piratta  
 pirrata  
 pirata



### 6d Traha un lista

Imagina bo lo siguiente. Bo mester bay un isla inhabita.  
Bo ta bay pa un siman. Kico lo bo bay cu ne?  
Corda bon, no tin tienda ni supermercado riba e isla.

Bo ta traha un lista di cos cu bo mester pa e siman ey.


- Skirbi dies cos mas riba e lista.
- Pinta algo di e isla banda di bo lista.
- Traha e tarea aki den bo buki di tarea.

#### Mi Lista

1. Boter di awa
2. Fruta
3. ....
4. ....
5. ....
6. ....
7. ....
8. ....
9. ....
10. ....
11. ....
12. ....







## 1 Scucha y papia

### Combersacion den kring

Nos a traha un huki di soño den klas.

- Awor bo ta bay combersa den kring tocante soño.
- Bo a yega di soña?
- Kico bo a yega di soña?
- Bo por conta un soño bunita?
- Bo por conta di un soño cu a duna bo miedo?
- Tin ora un hende ta pensa leu y ta soña lanta.  
Abo sa soña lanta?
- Bo a yega di soña lanta den klas?

### Regla di combersacion

*Ora nos kier conta algo, nos ta conta esaki na tur mucha den grupo.*



## 2 Mi por lesa

### Pais di soño

Timo ta biba hunto cu su mama y tata den un pais leu for di nos isla. Tur anochi prome cu Timo bay drumi, Mama ta lesa un cuenta p'e. Casi semper Timo ta asina cansa cu, prome cu Mama sali for di su camber ya e ta morto na soño caba.

Awe atrobe Mama ta lesa un cuenta masha leuk. Pero awe si Timo no ta pega soño mesora. E ta tende un zonido straño na bentana. Tik, tik, tik. Ta kico e zonido ey ta?, Timo ta pensa. Tik, tik, tik. Un tiki curioso Timo ta bula baha fo'i cama y e ta core bay na e bentana. E ta habri e cortina. Pafo Timo ta mira un meuchi blanco. Riba su lomba tin un kabouter sinta cu tin un pidjama strepia bisti. E tin un bonechi riba su cabes.

“Bo ta habri e bentana, Timo?”, e kabouter ta puntra. Timo ta para riba su tenchi. E tin cu pone un tiki forsa, prome cu e logra habri e bentana. Pa su sorpresa e meuchi ta bula drenta mesora y e ta cay sinta riba Timo su cama.

“Con ta, Timo?”, e kabouter ta puntra. “Bo sa ta ken mi ta?”  
 “N ... n ..., no”, Timo ta gaga.  
 “Nunca mi no a yega di mira bo.”  
 Cu un sonrisa e kabouter ta bisa:  
 “Ami ta Kabouter Soño. Tur anochi mi ta pasa wak, si tur mucha ta drumi caba. E muchanan cu no por pega soño, mi ta yuda un tiki. Mi ta strooi djis un tiki santo di soño den nan wowo pa nan pega soño mesora. Tur anochi mi ta mira cu abo si ta bay drumi bon mucha asina. P'esey mi tin un sorpresa pa bo. Bo ke ban dal un keiro cu nos? E ora ey bo mes por mira con mi ta strooi santo di soño.” Timo no ta pensa dos biaha. “Mi ta bay cu boso!”, e ta bisa contento. “Subi riba mi lomba numa!”, e meuchi ta bisa. Timo ta subi sinta riba lomba di e meuchi y mesora nan ta bula bay te halto aya. Ayabou e ta mira yen di cas, palo, cadushi y auto chikito. Nan ta bula pasa riba un misa cu toren halto y tambe riba un scol. Na e momento aki no tin niun mucha den cura di scol.  
 Nan ta sigui bula. Kabouter Soño ta wak den tur cas. Unda cu tin mucha ta cana rond ainda, e ta strooi un nubia di santo di soño. Timo no tin basta wowo pa wak.



Nan tin basta rato ta bulando caba, ora cu Kabouter Soño ta bisa diripiente: “E santo di soño a caba.”

Mesora e meuchi ta cuminsa bula mas duro. Awor nan ta pasa riba un lama blauw y grandi. Timo ta tene duro na e halanan. Biento ta supla den su horea. Den esey e ta mira algo manera un sero. Ora nan yega mas cerca di e sero, nan ta mira cu ta un isla chikito. Pocopoco e meuchi ta baha, pa un rato despues e bay para riba e isla chikito ey.

*E cuenta ta continua.*

### 3 Bo a compronde?

- Lesa e cuenta prome.
- Despues contesta e preguntanan.

#### Pregunta

1. Kico Mama ta haci tur anochi prome cu Timo bay drumi?
2. Kico Timo ta tende un anochi?
3. Kico Timo ta mira ora e habri e cortina?
4. Dicon Timo ta gaga ora Kabouter Soño ta puntr’e si e sa ken e ta?
5. Kico Kabouter Soño ta haci pa tur mucha pega soño?
6. Cua ta e sorpresa cu Kabouter Soño tin pa Timo?
7. Kico ta nifica: *Timo no ta pensa dos biaha?*
8. Kico Timo ta mira ora nan ta bula?
9. Unda nan ta bay ora e santo di soño caba?
10. *Mi tin soño y mi kier conta bo un soño* ta dos cos diferente. Bo por splica e palabra *soño*?
11. Meuchi ta un parha grandi di lama. Bo por menciona tres otro parha grandi di lama?



## 4 Vocabulario

### Huki di soño

“Ken kier bay Pais di Soño?”,  
Meneer Arie ta puntra.

“Ami!”, “Ami, Meneer.”, “Ami  
tambe, Meneer!”, tur mucha ta grita  
den otro.

“Nos ta bay den bus, Meneer?”,  
Charlie ta puntra.

Henter klas ta cuminsa hari.

“Bo no a paga tino ayera, Charlie?”,  
Meneer ta puntra.

“E siman aki nos ta cambia nos  
klas pa Pais di Soño. P’esey tur  
hende mester trece algo awe pa nos  
huki di soño! Kico abo a bin cu ne,  
Charlie?”, Meneer ta sigui puntra.  
Charlie ta lanta para y ta muestra riba  
un wekker. “Bon, Charlie! Ata bo  
sa! Bay pone bo wekker den e huki  
di soño”, Meneer ta bis’e.

“Ami a trece un cusinchi, Meneer!”,  
Lily ta grita contento. “Anto ami  
a bin cu un pidjama”, Stefan ta  
agrega. “Ami a trece un kot. Papa a  
pon’e tanten contra e muraya pafó  
di klas”, Roly ta bisa. “Ora nos bay  
campa, mi sa drumi riba un kot.”  
“Y ami a trece e luz di anochi di mi  
Mama”, Mila ta bisa.

“Awe nochi Mami tin cu drumi den  
scur.”

“Bo mama no tin miedo den scur?”,  
Gina ta puntra.

Mila ta hari y e ta bisa: “Ay no, den  
Pais di Soño bo no tin miedo. Casi  
semper ta dushi bo ta pasa.”

### Tarea 1

Kico bo ta yena?

- Lesa e frase bou di cada plachi.
- Busca e palabra(nan) cu falta den e rij di palabra akibou.
- Skirbi e palabra(nan) den bo buki di tarea.

### Tarea 2

- Pensa cuater palabra mas cu tin di haber cu drumi of soña. Skirbi e palabranan aki den bo buki di tarea.


• bon nochi

• corchon

• cusinchi

• drumi

• hap



1



Ora mi haya soño,  
mi ta ...

2




Prome cu bo bay  
drumi, bo ta yama ...

3



Prome cu mi subi  
cama, mi ta cende  
e ...

4



Riba mi cama tin un  
... y un ...

5



Riba e corchon tin un  
...  
E cusinchi ta den un ...

6



Ora mi subi cama,  
mi ta ... y tin ora mi  
ta ...

### Tarea 3

- Skirbi e siguiente frase den bo buki di tarea y caba e frase. Ora un hende ta ronca y ta stroba mi di drumi, mi ta ...
- Skirbi den bo buki di tarea tres cos cu bo ta haci ora bo lanta mainta.

• laken

• luz di anochi

• slopi

• soña

## 5 Pensa bon

### 5g Kico bo ta yena?

- Den cada frase falta palabra.
- Busca e palabra(nan) cu falta.
- Skirbi e palabra(nan) corecto den bo buki di tarea.

Bo por scoge for di:

cusinchi – corchon – drumi – drumi dushi –  
hap – luz di anochi – santo di soño – soña

### Timo ta bay drumi


1. Timo tin soño y e ta ...
2. “Ta ora di bay ...”, Mama ta bisa.
3. Riba Timo su cama tin un ... y un ...
4. Ta scur y Mama ta cende e ...
5. “..., Timo”, Mama ta bisa.
6. Kabouter Soño ta strooi poco ... den su wowo.
7. Un rato despues Timo ta drumi y e ta ... dushi.

### 5h Busca e palabra cu nificacion contrario

- Busca na cada palabra den e prome rij e palabra cu nificacion contrario den e di dos rij.
- Skirbi e palabranan aki den bo buki di tarea.
- Ehempel: grandi – chikito.

cayente – drumi – duro – hopi – rico – tristo – yen – zuur  
bashi – contento – friu – moli – pober – spierta – tiki – zoet





### 5i Kico bo ta contesta?

- Wak e plachi.
- Contesta awor e preguntanan akibou.

*Ehempel:*

E beer ta banda di e stoel?  
No, e beer ta riba e stoel.

- Haci uzo di un di e palabranan akibou.
- Bo por uza un palabra mas cu un biaha.

banda di – bou di – entre – riba – patras di

1. E laken ta banda di e cama?
2. E macutu ta riba e mesa?
3. E spiel ta colga banda di e lampi y e vaas?
4. E stoel ta entre e cama y e bentana?
5. E popchi ta sinta bou di e cama?
6. E slof ta riba e mesa?



### 5j Cua frase ta bon?

- Lesa e frasenan akibou.
- Cua di e frasenan ta bon?

1. E mucha ey gusta aventura, e tin miedo di tur cos.
2. E mucha ey ta spierto, e no tin miedo di nada.
3. E mucha ey ta masha timido, e ta blo hala atencion.
4. E mucha ey ta masha timido, e no gusta atencion.



## 6 Skirbi bon

### 6e Drecha frase


- Den e frasenan akibou no tin mayusculo.  
Den e frasenan no tin punto, ni signo di pregunta y ni signo di sclamacion tampoco.
- Drecha e frasenan.
- Skirbi nan sin fout den bo buki di tarea.


1. timo no tin suficiente wowo pa wak
2. ayabou e ta mira yen di cas y auto chikito
3. nan ta bula pasa riba un misa y riba un scol
4. no tin niun mucha den cura di scol
5. kabouter soño ta wak den tur cas
6. ken no ta drumi ainda
7. unda tin mucha lanta, e ta strooi santo di soño
8. mucha mester drumi trempan

### 6f Lesa y scoge

- Pone cada palabra den e kolom corecto.
- Traha e tarea den bo buki di tarea.

	bl	fr	sc	st
blanco	stoma	bleki	fragil	sconde
fraña	blaf	frase	stoba	stinki
stoel	scol	stijf	scama	blachi
scapa	frenta	scur	blink	friu





### 6g Lesa y skirbi

- Lesa e frasenan akibou bon.
- Skirbi e palabranan cu tin color blauw den bo buki di tarea.

1. Den klas Meneer ta conta di **soño**.
2. Un **giraf** ta drumi solamente dies **minuut**.
3. Un **leon** por drumi binti ora.
4. Tin un **musca** na Africa cu yama tse tse.
5. Ora e musca ey pica un persona, e ta haya **malesa di soño**.
6. Ora bo ta **drumi**, bo cabey y **huña** ta crece mas **lihe**.
7. Ora bo ta na soño, bo wowonan ta **move** bay bin.



### 6h Dictado di frase simpel

- Awor bo ta bay traha un dictado.
- Bo maestra/o ta ripiti e palabranan cu abo tin cu skirbi.

### 6i Domino di palabra

- Busca e pidanan cu ta pas cu otro y forma palabra.
- Skirbi e palabranan den bo buki di tarea.



	so
chi	lan

ta	dru
ño	cusin

mi	ca
ma	slo

pi	de
ken	

## 1 Scucha y papia

### E garasoño

Ya pa un par di dia caba Madushi Nocomis, un wela Indjan, ta sinta wak con un haraña ta traha su spendera. Net ora e haraña ta cabando cu su cas, Ictomis ta cana drenta den e wigwam di su wela. Den e tent di su wela Ictomis ta mira e haraña. “Uy, un haraña!”, Ictomis ta grita. “Laga mi mat’e pa Madushi.” Ictomis ta kita su mocasin pa dal e haraña mata. “No, Ictomis, no mata e haraña cu bo mocasin”, Madushi ta bisa, “no haci e haraña dolor. Haraña ta bestia util. Nan ta coy tur insecto cu ta haci hende daño. Wak con e bestia ta traha su spendera. Ta un obra di arte. Un bestia valioso asina hende no mester mata.” Ictomis ta keda para wak un rato, despues e ta bisti su mocasin bek y e ta bay hunga pafo.

“Danki, Madushi”, e haraña ta bisa gradicido.


“Madushi a scapa mi bida.”

“Ma ta claro!”, Wela Nocomis ta contesta. “Tur dia mi ta sinta admira bo y bo bunita spendera.”


“Mi ke regala Madushi algo pa yama danki”, e haraña ta bisa.

Ta kico e haraña lo regala Wela?





- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba di contesta e preguntanan cu bo maestra/o ta haci awor.



## 2 Mi por lesa

*E cuenta ta continua.*

### Pais di soño

“Esaki ta Pais di Soño. Aki mi ta biba”, Kabouter Soño ta conta. Riba e isla Timo ta mira un kasteel grandi traha di santo. E paleis ta masha bunita ilumina. Den cura tin lanterna y lampion den tur palo.

“Ban!”, Kabouter Soño ta bisa, “awor mi ta bay muestra bo unda nos ta traha santo di soño. Ta ami so sa con mester traha e santo special aki, pero tin hopi kabouter ta yuda mi yena e santo den saco.”

Den un sala basta grandi Timo ta mira mesa largo cu diferente serito di santo. Santo fini fini masha special color di oro.

Riba e mesa tin saco tambe. Cu un scop chikito kabouter homber y muhe ta yena e saconan. “Bonbini, Timo”, nan ta bisa ora Timo cu Kabouter Soño drenta e sala. “Nos ta contento cu bo t’ey, Timo.”

“Mi por yuda boso?”, Timo ta puntra. “Sigur no”, un kabouter cu un cara pret ta contesta. “Mi tin un scop chikito pa bo tambe.” Timo ta yena un saco tras di otro. E ta den su

zjilea. Ora un saco ta yen, e ta mara un strik grandi na dje.

Ora ta bula. Ta te ora e meuchi y Kabouter Soño drenta e sala atrobe, Timo ta compronde cu anochi a pasa y cu di dia a habri. “Ay, mi tin gana di keda un rato mas”, Timo ta bisa. “No, esey si no por”, Kabouter Soño ta contesta. “Cualke otro biaha mi ta bin busca bo atrobe.”

“Bon dia, Timo, lanta for di soño”, Timo ta tende diripiente. Ta e meuchi ta yam’e? Pocopoco Timo ta purba habri su wowo. E ta mira un rayo di solo ta loer door di su bentana. No ta e meuchi ta para banda di dje, pero ta Mama. “Ban mira”, Mama ta bisa, “bo tin cu bay baña pa bay scol.”

“Mi a soña dushi asina, Mama”, Timo ta bisa. “Ta na Pais di Soño mi tabata.”

Mama ta hari. “Si”, e ta bisa, “bo tin wowo di soño ainda.” Timo ta frega su wowo. Ta manera cu ta santo tin den dje.

Pafo e meuchi y Kabouter Soño ta sinta den palo. Ora nan mira Timo cana bay baño, Kabouter Soño ta zwaai yama ayo cu su bonechi.



Despues nan ta bula bay. Anochi nan lo bolbe pa parti e soñonan mas bunita pa tur mucha.



### 3 Bo a compronde?

- Lesa e cuenta prome.
- Despues contesta e preguntanan.

#### Pregunta

1. Unda Kabouter Soño ta biba?
2. Con e paleis di Kabouter Soño ta?
3. Ken ta yuda Kabouter Soño yena santo di soño den saco?
4. Kico Timo ta mira ora nan drenta sala?
5. Kico e kabouteranan ta bisa ora Timo drenta sala?
6. Kico Timo ta puntra e kabouteranan?
7. Kico Timo ta haci ora un saco ta yen?
8. Ki ora Timo ta compronde cu anochi a pasa y cu dia a habri?
9. Timo kier bay cas? Splica dicon si of dicon no.
10. Ken ta para banda di Timo su cama?
11. Kico Timo ta conta Mama?
12. Kico Kabouter Soño ta haci ora Timo cana bay baño?
13. Pais di Soño ta titulo di e cuenta aki. Ki otro titulo mas bo por duna e cuenta aki?

## 4 Vocabulario

### Stoel di soño

Juffrouw a pone e stoel di soño dilanti den klas. Tur mucha ta contento, pasobra nan sa cu awe nan ta bay tende hopi soño atrobe. Esun cu sinta riba e stoel tin cu conta su soño.

Ta Zita su zjilea, pasobra e gusta conta.

Manera juffrouw bisa cu por cuminsa, e ta core bay sinta riba e stoel di soño.

“Ayer mi a soña cu hopi hada”, e ta conta. “Nan a bula drenta mi camber.

Tur tabatin un stoki pa haci magia den nan man. Nan tabata canta masha bunita. Mi a drumi te mainta.”

“Esta un dushi soño”, Juffrouw ta bisa. “Ken ta sigui?”

Awor ta Lisa ta bay sinta riba e stoel. “Ayer ami a soña cu un man grandi a sali for di bou di mi cama. E man a hisa mi. Mi a sapatia masha hopi y mi a grita masha duro. E man a laga mi cay. Despues el a desaparece. Mami di cu mi a soña un mal soño. Mi a haya un pesadia.”

Despues Freddy ta bay sinta riba e

stoel di soño. “Ayer nochi mi ruman Lisa a lanta y a cuminsa cana den su soño. Mami a lanta y a pone Lisa drumi bek. Mami a bisa mi cu Lisa ta un sonambulo.”

Sonny no ta warda Juffrouw dun’e turno. “Ami gusta soña lanta. Ora mi ta traha mi huiswerk, mi tino ta kita bay na un otro scol. Na e scol ey no tin huiswerk. Tur mucha ta hunga henter dia.”

Henter klas ta bati man y ta grita den coro: “Esey ta un dushi scol. No ta berdad, Juffrouw?”

“Mm”, juffrouw ta bisa, “mm, tin biaha soño ta bira realidad. Pa mañan boso no ta haya huiswerk. Nos scol tambe ta un dushi scol.”

“Ye”, tur mucha ta grita contento.

“Biba nos scol y biba e stoel di soño!”

### Tarea 1


Kico bo ta mira?

- Lesa e frase bou di cada plachi.
- Busca e palabra cu falta den e rij di palabra akibou.
- Skirbi e palabra den bo buki di tarea.

• bata

• bonechi

• garasoño



1



Mi ta mira un ...

2



Un mal soño ta un ...

3

Un hende cu ta cana  
den su soño ta un ...

4

Ora bo ta ..., bo ta  
stroba otro hende di  
drumi.

5

Antes tabatin hende  
cu tabata drumi cu  
un ... riba nan cabes.

6

Riba bo pidjama of  
yapon bo por bisti  
un ...

### Tarea 2

- Pensa cuater palabra cu tin di haber cu un sonambulo.
- Skirbi e palabranan den bo buki di tarea.

### Tarea 3

Bo tabata sa?  
Tin hende ta soña na preto cu blanco. Mayoria di hende ta

soña na color. Y tambe t'asina cu tin hende cu ta corda nan soño cla cla. Otro ta hura cu nan no ta corda nada mes. Pero un cos ta sigur, tur hende ta soña.

- Skirbi den bo buki di tarea na ki color abo ta soña y kico bo a yega di soña.

• pesadia

• ronca

• sonambulo

## 5 Pensa bon

### 5k Kico bo ta yena?

- Den cada frase falta un palabra.
- Busca e palabra cu falta.
- Skirbi e palabra corecto den bo buki di tarea.

Bo por scoge for di:

bestia – garasoño – gradicido – mocasin – pluma – regalo – soño – spendera – util – wigwam



### E garasoño

1. Madushi ta sinta wak con un haraña ta traha un ...
2. Ictomis, e nieto di Madushi a cana drenta den e ...
3. E nieto ta kita su ... pa mata e haraña.
4. “No mata e ...”, Madushi ta bisa.
5. “Haraña ta bestia ...”
6. “Danki, Madushi!”, e haraña ta bisa ...
7. E ta duna Madushi su cas di haraña como ...
8. Ora Madushi bay drumi, e spendera ta gara tur ...
9. E otro Indjannan tambe kier un ...
10. Cu hilo, cralchi y ... nan ta purba traha un.



### 5l Scoge e palabra corecto


- Scoge y skirbi e palabra corecto den bo buki di tarea.

### Ayo pesadia

1. Frenky ta ... su mes garasoño.
2. E ta ... un hemchi grandi color geel.
3. Riba dje e ta ... un strea.
4. Tambe e ta ... hilo riba e hemchi.
5. Frenky ta ... e hemchi bou di bentana.
6. Anochi e pesadianan ta ... den e hemchi.
7. Mainta solo ta ... tur pesadia.

cay  
kima  
pinta  
pone  
span  
traha  
verf





### 5m Traha palabra

- Traha palabra cu -dad na final
- Di *bon* bo ta traha *bondad*.
- Sigui asina cu e siguiente palabranan.

1. Di *mal* bo ta traha ...
2. Di *fiel* bo ta traha ...
3. Di *cruel* bo ta traha ...

Paga tino, esakinan ta mas dificil!

- Traha palabra cu -idad na final
  - Di *cla* bo ta traha *claridad*.
4. Di *scur* bo ta traha ...
  5. Di *sigur* bo ta traha ...
  6. Di *trankil* bo ta traha ...

- Bo sa mas ehempel?

### 5n Positivo

- Lesa e palabranan akibou.
  - Skirbi tur e palabranan cu ta nifica un cos bon den bo buki di tarea.
- Ehempel: amabel - ...

amabel – balente – bunita – cariñoso – caweta – curioso – fantastico – fastioso – feliz – floho – haragan – interesante – miedoso – pichiri – sabi – tremendo

### 5o Cua frase ta nifica casi mescos cu otro?


- Busca e frasenan cu ta nifica casi mescos cu otro y bisa cua nan ta.


- |                                 |                                  |
|---------------------------------|----------------------------------|
| 1. Timo ta contento.            | a. Timo kier keda.               |
| 2. E ta bishita e kabouterman.  | b. Timo a soña dushi.            |
| 3. Timo no kier bay cas ainda.  | c. Timo ta feliz.                |
| 4. Timo tabatin un bunita soño. | d. Kabouter Soño ta bin bek .    |
| 5. Kabouter Soño ta bolbe.      | e. E ta bay cerca e kabouterman. |

## 6 Skirbi bon

### 6j Traha un strip

- Skirbi e palabra *soño* memey riba un blachi den bo buki di tarea.
- Skirbi otro palabra acerca.
- Purba traha frase cu e palabranan cu bo a skirbi.
- Cu e frasenan bo ta traha un cuenta cortico.
- E cuenta ta bira un strip. Pinta seis hoki.
- Den cada hoki bo ta skirbi un frase y bo ta pinta algo cu tin di haber cu e frase.
- Ora bo caba, bo ta kleur e plachinan.
- Awor bo strip ta cla.





## 7 Tarea varia


### 7a Palabra cu no ta pas den frase

- Lesa e frasenan akibou bon.
- Den tur frase tin un palabra cu no ta pas.
- Pensa un otro palabra cu si ta pas den e frase.
- Skirbi e frase nobo den bo buki di tarea.



### Ora di bay drumi

1. Anochi Raiza ta colga su pidjama pa e drumi.
2. E ta kleur su djentenan.
3. Mama ta canta Raiza un cuenta di hada.
4. Despues di un rato Raiza ta lanta.
5. Mama ta corta e cortinanan.
6. Prome cu Mama bay, e ta manda luz.
7. E garasoño den Raiza su camber ta gara tur paña.



### 7b Garasoño

Hopi hende rond mundo tambe kier un garasoño.  
Casi tur garasoño ta rondo.  
Pero tin biaha bo ta mira garasoño den forma  
di un gota of un sapato.

Tambe tin garasoño den forma di curason of pata di hero.  
No ta nada straño cu tin diferente forma di garasoño.  
Forma di spendera di haraña tambe ta varia.

- Pinta un garasoño y skirbi acerca dicon bo a scoge e forma ey.



### 7c Crucigrama

- Lesa e frase y pensa e palabra cu mester yena den e hokinan horizontal.
- Skirbi e palabranan aki den bo buki di tarea.
- Den e hokinan color cla bo por lesa vertical (di ariba bay abou) un palabra nobo.
- Skirbi e palabra ey na frase 9.

	1							
		2						
	3							
4								
	5							
		6						
	7							
		8						

1. Un tent di Indjan ta un ...
2. Un otro palabra pa caha di tesoro ta ...
3. Un otro palabra pa matras ta ...
4. Un sapato di Indjan ta un ...
5. E rey ta biba den un ...
6. Pa bo haya sa unda bo ta riba lama bo ta uza un ...
7. Tur dia mester ...
8. Un hende cu ta paga candela yama un ...
9. Un ... ta gara tur soño malo.

